

U Bulungana u Niga tere Iesu Kristo te kolotein e JON

U Rangana tara Nitöatöa

¹ Tara tantania e kamei u Ranga, u Ranga e kagono mei e Sunahan na u Raranga teka nonei e Sunahan. ² Nonei e ka gono mei e Sunahan tara tantania. ³ E Sunahan e habutu silanaia a mamanaka turu Ranga. E möa ta töa taka tega butu peisa. A mamanaka e butu sila lasia turu Ranga. ⁴ A nitöatöa e kaia i tanen, na nitöatöa teka u ualesala turu katuun hoboto. ⁵ Nonei u ualesala teka e halesalena u kuhil, na u kuhil ema antunan kopo kap naien. ⁶ E Sunahan e hala nema a töa a katuun a solonen e Jon. ⁷ E Jon e la silema tegomi hatei meraien u katuun u ualesala teka, ba u katuun hoboto te tatei hamane ren. ⁸ Nonei u ualesala teka ema Jon nei, kaba nonei e la silema tegomi hatei meraien u katuun nonei u ualesala. ⁹ Nonei hamatskö koku u ualesala teka te halesala rena u katuun hoboto e lauama i puta. ¹⁰ Nonei e lauama tara han i puta te habuteien, kaba u katunura i puta ima mareien. ¹¹ Nonei e la uama turu katuun i tanen kaba nori ima ngileien. ¹² Kaba turu katuun ti lu menaien i taren na ti hamana korueien, nonei e hala raien a nitsunono tegi pien uaien tere Sunahan. ¹³ Nori i posa lelij, kaba ima mar posa lel merai te hatuhana meri a pien te butunama tere tamanen na e tsinanen na i puta. E möa. Kaba a nituhana teka e la

nama tere Sunahan. ¹⁴U Ranga e butun katunuma memi kana i gusurara. Nonei a tsonun hihitaguhu na tsonuna tara nimana. Alam u tara hakapi a nitsunono i tanen, a mar nitsunono te kamena a töa koru a Pien Tson tere Sunahan, e Tamanen i Kolö. ¹⁵E Jon e ku hatei naien turu katuun me poeiena, “Nonei a katuun teka tu rangein lia tu pei menai lia, ‘A töa a katuun e kukute nama romana i murir nonei a katuun te pan bala koru nanou lia, taraha nonei e ka mam noahas naiou lia tara Tantania.’ ” ¹⁶Na tara nihitaguhu pan i tanen nonei e haniga ranou ra na e hala has ranei ra a nisasaala pan tema tatei kapa nei. ¹⁷E Sunahan e hala silanama a Lo tere Mosis, kaba u pannen u nihitaguhu na nimana tere Sunahan i habutu sila nama tere Iesu Kristo. ¹⁸E möa ta töa ta katuun tega tara noabi e Sunahan. Kaba a töa koru a Pien Tson i tanen, nonei has e Sunahan te sukusuku koruna i torina e Tamanen, nonei te haröto raira e Sunahan.

*U raranga tere Jon a Tsonun Baptais
(Matiu 3:1-12, Mak 1:1-8, Luk 3:1-18)*

¹⁹Turu töa u lan a pal kapan turu Jiu i Jerusalem i hala mera mei u pris na u Livai tere Jon. Ba nori e rangate ren me poeier, “Alö esi? Alö e Mesaia tega la uama i puta?” ²⁰Be Jon e holisina me ranga hamatskö mera nen me poeiena, “Alia ema Mesaia gi.” ²¹“Bara, galö besi koru? Alö e Ilaita a propet?” Ba nonei e poeiena, “E möa.” Ba nori e poeier, “Alö toum nonei a propet te hahalose mulam?” Ba nonei e poe lenea, “E möa.” ²²“Galö besi? Alam e ngilem tu raranga go lapouts mei lam turu katuun te tula rari moulam. Alö e ngöeri esi?”

²³ Ba nonei e poeiena, “Alia e heregi a runguna a katuun te ku hapanna tara makum a palaka bate poeiena, ‘Kato hamatsköeiam a maroro, a Tsunono e la nama,’ temar ranga uu e Aisaia a propet.”

²⁴ Ba u Parasi ti hala rema ²⁵ e rangate ren me poeier, “Tema Mesaia mia lö na tema Ilaitsa mia lö na tema Propet hasmia lö, gaha te baptais sil rami lö u katuun?” ²⁶ Be Jon e ranga palis ranen me poeiena, “Alia e baptais negu u ramun tuun. Kaba a töa katuun tema atei sile milimiou e kana i gusumilimiou. ²⁷ E manana a toukui i tanen e kute has nama tara toukui te kuieiegu lia, kaba lia ema gogoso hantue gi tego purese menai lia a kikitsina u sendol i tanen.”* ²⁸ A ka teka e butuia tara han i Betani i hapalana a ramun i Jodan, te baptais raia e Jon u katuun.

A Tunan Sipsip tere Sunahan

²⁹ Turu tana u lan be Jon e tarena e Iesu e la uama i tanen, be Jon e poeiena turu katuun, “Taraia, nonei teka a Tunan Sipsip tere Sunahan. Nonei tena luba nanou a man markato a man omi turu katuun i puta. ³⁰ Nonei a katuun teka tu rangein lia bate poeiegu, ‘A töa katuun e kute nama romana i tar, nonei te pan bala nanou lia, taraha nonei te tuhana mam naiou lia.’ ³¹ Alia uma atei sil hasei esi nonei koru e Mesaia. Kaba lia emi baptais mei u ramun tego halakasa mei lia e Iesu turu katunura i Israel.” ³² E Jon e baptaisi e Iesu, ba i murinen ba nonei† e poeiena, “Alia u tari u Namnamei u Göagono tere Sunahan e koul

* **1:27:** Teka e poeiena, Nonei e kapan balana, alia ema antunan pile has nagi u sendol i mounen. † **1:32:** Jon e ranga noahasina.

here mei a kulu i Kolö memi tö na i tanen. ³³ Alia uma atei silei esi koru nonei e Mesaia. Kaba e Sunahan, te hala namou lia tegomi baptais merai lia u katuun u ramun, nonei e poei i tar, ‘Alö ena tare mou u Namnamei tere Sunahan e koul nama romana batemi tö na tara töa katuun. Nonei a katuun teka tena baptais nanou u Namnamei u Göagono.’” ³⁴ Be Jon e poeiena, “Alia u tari a ka teka e butuia tere Iesu Kristo, na lia e hatei hamana ragi limiou, nonei a Pien Tson tere Sunahan.‡”

U katunun tsitsilo tutuun tere Iesu

³⁵ Turu tana u lan be Jon e tuol gono pon meraiena a huol a katunun tsitsilo i tanen. ³⁶ Ba pöata te tareien e Iesu e tataalama ba nonei e poeiena, “Taraiam nonei a Tunan Sipsip tere Sunahan i tioum.” ³⁷ Ba huol a katunun tsitsilo tere Jon e hengoeier u ranga teka me kukutier e Iesu. ³⁸ Pöata te habirits ia e Iesu me tarena ti kukute uamen ba nonei e poeiena i taren, “Alim-iou e sake miou aha?” Ba nori e poeier i tanen, “O Rabai, ime tena soho moa lö?” (Rabai e poeiena, tson hihatuts.) ³⁹ Ba nonei e poeiena i taren, “Mi taraiam.” Ba nori e la gono meren mena ka gono meren nonei turu lan teka. A ka e 4 kilok hamanasa tara lahi. ⁴⁰ A töa tara huol a katuun teka ti hengi u raranga tere Jon, e Endru e toulana e Saimon Pita. ⁴¹ Be Endru e la hamatsköna tere toulanen e Saimon me poeiena i tanen, “Alam e sabie muma e Mesaia.” (E Mesaia e ngö haseri e Kristo.) ⁴² Ba nonei na piou nena e Saimon tere Iesu. Be Iesu e tare nen me poeiena, “Alö e Saimon, a pien tson tere Jon. Alö e ngöe roi e Sipas” (te poe hasena, “e Pita,” na te poe hasena, “a Hatu”).

‡ **1:34:** A katuun te tusi e Sunahan.

E Iesu e ngö rena ere Pilip mere Nataniel

⁴³ Turu tana u lan e Iesu e hakatsin tega lauen tara han i Galili. Nonei ena sabi e Pilip me poeiena i tanen, “Kukute mumou lia.” ⁴⁴ E Pilip a toun Betsaida, a taun tere Endru mere Pita. ⁴⁵ Be Pilip e na sabe leleiena e Nataniel me hateie nen, “Alam e sabie muma e Mesaia, a katuun te koloto bin e Mosis nu propet i manasa! Nonei e Iesu a toun Nasaret, a pien tere Josep.” ⁴⁶ Be Nataniel e poeiena, “E möa ta ka ta niga tega tatei butuia i Nasaret.” Be Pilip e poeiena, “Lama balö temi tara peisam.” ⁴⁷ Pöata te tara raien e Iesu ba nonei e ranga nena e Nataniel me poeiena, “A toun Israel hamana te la nama teka. Nonei ema tatei gamogamo nei.” ⁴⁸ Be Nataniel e rangatena e Iesu, “Ime temar atei sil mena milö alia?” Be Iesu e ranga palise nen, “U hakhakats tuun i tar te tare lalou lö i mouna u ruein fik i mamina tena ngöe lala lö e Pilip.” ⁴⁹ Be Nataniel e poeiena, “O Rabai, alö a Pien tere Sunahan! Alö a katuun te hopö kap bin e Sunahan tego Kingia i Israel!” ⁵⁰ Be Iesu e rangate nen, “Alö e hamana mem te poe mena gulei lia, alia e tare gulo lö i mouna u ruein fik? Alö ena tare mou romana a man mirakol te pan bala nena a ka teka. ⁵¹ U mana koru alia e hatei ragou limiou, alimiou e tare mou romana u Kolö e kalata nou ba u angelo tere Sunahan te sei ria romana i tar bate koul pouts has rima romana i tar, Alia tu butun Katunuma.”

2

A hitöl i Kena

¹ Turu hatopisana u lan, a töa katuun e hitöl ia tara taun i Kena tara provins i Galili, e tsinana e Iesu e ka has. ² E Iesu na u katunun tsitsilo i tanen i ngö has merai nonei tara hitöl teka. ³ Pöata te kapaia a uain, be tsinana e Iesu e poeiena i tanen, “A uain i taren e kapa.” ⁴ Be Iesu e ranga menen me poeiena, “Ema ka uanei i tamölö na lia. A pöata i tar e ka noana.” ⁵ Be tsinanen e poeiena turu katunun kui, “Alimiou e katoe mou a manka te ranga nanen.” ⁶ E ka mei a tönomo a tabeli e kaia nonei tara luma teka, a manka ti roron kato hagogoseia u Jiu a peisaren tara mar niateina tara markato ti galus menai u katuun a limaren. A töa tara man tabeli teka e tatei osuler bate antunana tara 100 lita tsi a 150 lita. ⁷ Be Iesu e poeiena turu katunun kui, “Osulemi a man tabeli teka tu ramun.” Ba nori e osul hasaputu hoboter a man tabeli. ⁸ Ba nonei e ranga mera nen me poeiena, “Kana tale iam ta töa ta kap ba limiou tena hale mien a tson te taratara kap nena a kannou.” Ba nori e la mena rien i tanen. ⁹⁻¹⁰ Ba tsonun taratarakap tara kannou e torohanena u ramun ti hagou palis menai tara uain. Nonei ema atei silei ime te lama a uain teka. Kaba u katunun kui ti osuli u ramun nori ti atei. Ba tsonun taratarakap tara kannou e ngöena a tson te hitöl me poeiena i tanen, “U katuun hoboto e hihaua mam nalila u uain u niga, ba tara pöata te ua hatutu hakapa lila u katuun, ba nori e töan hihaua ner u uain tema niga bala nei. Kaba lö e töan louse muma u uain u niga.” ¹¹ E Iesu e katoei u mirakol teka, u hiharöto tutuun i tanen, i Kena tara provins i Galili. Na nonei e haröto rai u katuun temar pan uanen, ba u katunun tsitsilo i tanen e hamana uar i tanen. ¹² I

murina te kapaia a hitöl, be Iesu e la gono meiena e tsinanen, nu toulanen na u katunun tsitsilo i tanen i Kapenium tina gamon kaien a tsi tabubun pöata.

*E Iesu e la uu tara Luman Lotu Pan turu Jiu
(Matu 21:12-13, Mak 11:15-17, Luk 19:45-46)*

¹³ A pöata tara kannouna turu Paska turu Jiu e sukusuku, be Iesu e la uana i Jerusalem. ¹⁴ Nonei e tasuia iahana makum i rehina Luman Lotu Pan, ba nonei e sabe rena u katuun ti haholin a man bulmakau na man sipsip na man kulu. Na palai i gumia tara man tebol i taren ti palis menaien a moni. ¹⁵ Be Iesu e luena a kolits me kuie neien a kaan hisingata, ba nonei e tsuga ba rena u katuun teka na man bulmakau na man sipsip na manka hoboto tara makum i rehina Luman Lotu Pan. Ba nonei e tula kupu rena a man tebol turu katuun ti palpalsir a man moni me tsihasa nena a man silva i taren. ¹⁶ Ba nonei e poeiena turu katuun ti haholin a man kulu, “Luba naiam a manka teka! A luma tere Tamar ema tatei kato here nami limiou a luman töana!” ¹⁷ Ba u katunun tsitsilo i tanen e hakats pouts ner u raranga turu Buku u Göagono te poeiena, “A torir e matesil koruena a luma tere Sunahan ega ka haniga nitöa.” ¹⁸ Ba pal kapan turu Jiu e rangata seieren me poeier, “U saha u hiharöto te hatara nemölö te hatei nena alö e tatei markato uam teka?” ¹⁹ Be Iesu e ranga kopisina me poeiena, “Rurei iam a luma tere Sunahan teka balia te hatakei poutse goen turu topisa u lan.” ²⁰ Ba pal kapan turu Jiu e poeier, “Pua! A Luman Lotu Pan teka i hatakei mei u 46 u hiningal! Ime temar hatakei pouts boroboro mena moien lö turu topisa puku u lan?” ²¹ Kaba e Iesu e rangein a

peisanen te here nei a luma tere Sunahan. ²² Na i murimuri, te hatakei poutsia e Sunahan e Iesu tara tou mate i tanen, ba u katunun tsitsilo i tanen e hakats pouts ner te kato menaien u raranga teka. Ba nori e tōan hamaner u Buku u Göagono nu raranga tere Iesu.

E Iesu e atei sil rena u katuun hoboto

²³ E Iesu e kaia i Jerusalem tara pōata ti kateia u Jiu a kannouna turu Paska i taren. A parpara a katuun e hamanaia i tanen, taraha nori i tari a man mirakol te katoeien. ²⁴ Kaba e Iesu ema hamana raien, taraha nonei e atei sil u hakhakats turu katuun hoboto. ²⁵ E möa ta katuun ga hatei ien ime te markato uana a torir u katuun. Taraha, nonei e atei sil aha te kaia i torir u katuun hoboto.

3

E Iesu mere Nikodemus

¹⁻² A tōa katuun a solonen e Nikodemus a Parasi, a tson mammam turu Jiu, e la uama tere Iesu tara tōa bong memi poeiena i tanen, “O Tson Hihatuts, alam e atei silem alō u lama tere Sunahan. A man mirakol te katoe mölö te hatei peisa nena e Sunahan e ka gono me noulō” ³ Be Iesu e ranga palise nen me poeiena, “U mana koru alia e hatei hamana korue goulō, tema posa lele ria a katuun, nonei ema antunan atei sile nei a man kana tara Nipepeito tere Sunahan.” ⁴ Be Nikodemus e poeiena i tanen, “Ime temar posa lel mena roi a katuun te pan hakapa te lan tsonpan hamanasana? Nonei e antunan la poutsuna iahana u ongunon pien tere tsinanen bate posa hahuol lele riou?” ⁵ Be Iesu e ranga palis uana

i tanen me poeiena, “U mana koru alia e ranga mei goulö, tema pose ria a katuun turu ramun na turu namnamei, nonei ema antunan tasu nei tara Nipepeito tere Sunahan. ⁶ Aha te hatuhanena u tuenrei, nonei u tuenrei, na ha te hatuhanena u namnamei, nonei u namnamei. ⁷ Alö go ma asingoto nai te hatei menagi lia alö, ‘Alimiou gi posa pouts raiou.’ ⁸ A lomolomo e bahu uana te ngil uanen, balö te hengoem te ling uanen. Kaba alö ema atei silemi te la namen na te la uanen. Na e kato has uana iesana tara katuun te pose ria turu Namnamei.” ⁹ Be Nikodemus e poeiena i tanen, “Ime te tatei mar butu uana a ka teka?” ¹⁰ Be Iesu e ranga palisenen me poeiena, “Alö a tson hihatuts panina i Israel, alö ema atei sil noemi a ka teka? ¹¹ U mana koru alia e hateie goulö, alam e ranga nem a manka te atei sile mulam na lam e hahatei nem a manka tu tara hakapi lam, kaba alimiou e rama namiou a man raranga i tamulam. ¹² Alia u hatei rai limiou a man kana i puta ba limiou e hahamana miou. Galia e hatei ragoui limiou a man kana i Kolö ba limiou te hamana has mou? ¹³ E möa ta töa ta katuun tega la sei uu i Kolö. Alia puku lahas tu butun Katunuma tu koulma i Kolö. ¹⁴ E Mosis e söata sei u rui ti katoei u kesa tara kökötsi tara makum a palaka, alia has tu butun Katunuma ena markato has menaroi teka. ¹⁵ Tara markato teka ba esi te hamana na i tar ena tatei ka menou a nitöatöa te ka nitöana.”

¹⁶ E Sunahan e taatagi sil koru rema u katuun hoboto me hala nenama a töa koru a Pien Tson i tanen. Na katuun te hamana uana i tanen ema antunan tia noi romana kaba ena ka menou a nitöatöa te ka nitöana. ¹⁷ E Sunahan ema hala sile mei a Pien Tson i tanen i puta gomi koutir

u katuun. E möa. Nonei e hala sile meien gomi taguhir u katuun. ¹⁸ A katuun te hamana uana tara Pien Tson tere Sunahan ema kout naroi kaba a katuun tema hamana nei e ka noa has mena u kout, taraha nonei ema hamana uai tara töa koru a Pien Tson tere Sunahan. ¹⁹ U kout e markato uana teka: u ualesala e la uama i puta. U ualesala teka e haharuei nena a niateina tara manka hamana tere Sunahan. Ba u katuun te ngiler u kuhil bate rama ner u ualesala, taraha nori ema ka meri ta markato ta niga. ²⁰ Taraha, u katuun u omi e rama koru ner u ualesala, ba man markato a man omi i taren tema tatei lakasa nei. ²¹ Kaba a katuun te kato hamatsköna e laua nama turu ualesala, ba u ualesala te haröto nanou e Sunahan e hanigeiena a markato i tanen.

Iesu mere Jon

²² Ba i murinen, be Iesu na u katunun tsitsilo i tanen e la hoboto uar tara provins i Judia. Ba nori ena ka ria tara han teka me baptais raier u katuun. ²³⁻²⁴ E Jon e baptais hasir u katuun i Aion te sukuukuia tara han i Salim. Taraha, e kamei a ramun e gono na u katuun i lala uama i tanen timi habaptais uen. E Jon ima haka noei tara karabus. ²⁵ Ba palair u katunun tsitsilo* tere Jon na töa Jiu e hiaraharaha sil haser a saha mar baptais te matsköna. ²⁶ Ba nori e lauarima tere Jon me poeier i tanen, “Tson Hihatuts, alö e atei silem nonei a katuun te ka gono meiou lö i hapalana ramun i Jodan, nonei a katuun tu rangein lö? Nonei e baptais rena u katuun, ba u katuun te la hoboton töa uar i tanen!” ²⁷ Be Jon e ranga palis ranen

* **3:25:** U katunun tsitsilo tere Jon nori u Jiu has.

me poeiena, “A katuun e lu puku lase nou a ka te hale neien e Sunahan i Kolö. ²⁸ Alimiou u hengo mam naiam ti pei menai lia, ‘Alia ema Mesaia gi. E Sunahan e hala sile meilia tego mam mena meien lia.’ ²⁹ E Iesu e here nei a tsonun tölo na lia e heregi a tsonun hitaguhu i tanen. Pöata te hitöl mena a tson a tahol i tanen, ba tsonun hitaguhu te tuol hatalisina bate sasaala koruna te hengo mena neien u ranga tara tsonun tölo. Te markato uanen teka ba lia te sasaala koru hasigu. ³⁰ Nonei a katuun teka a solo nen egi hala sei, na solor egi haka putei.”

A katuun te lama i Kolö

³¹ A katuun te lama iasa e pan bala nena u katuun hoboto. A katununa i puta e kamena a markatona i puta na e ranga las nena a mankana i puta. Kaba a katuun te lama i Kolö e pan bala nena u katuun hoboto. ³² Nonei e hatei nena a manka te tare ien na te hengoeien. Kaba e möa ta katuun tego hengoe u ranga i tanen. ³³ Kaba a katuun te hengoe nen e sabiena te mana uana e Sunahan. ³⁴ E Sunahan te haleiema a katuun teka ba nonei emi hatei nena u raranga tere Sunahan. Na nonei e saputu mena u Namnamei u Göagono te hala nenama e Sunahan i tanen. ³⁵ E tamanen e Sunahan e ngil korue nen bate hale neien a mamanaka tego tsunono naien. ³⁶ A katuun te hamanena nonei a Pien tere Sunahan e ka mena a nitöatöa te ka nitöana. Na katuun te hahamanana na tema hengoe neien, nonei ema tatei lue nei a nitöatöa hamana, na raharaha tere Sunahan e ka nitöana i tanen.

4

E Iesu na taholina i Samaria

¹ U Parasi i hengoen u katunun tsitsilo tere Iesu i parpara baler u katunun tsitsilo tere Jon, na i hengo hasiin u katunun tsitsilo tere Iesu i bap-taisir u katuun u parpara. ² E Iesu ema baptais rai u katuun, u katunun tsitsilo i tanen lasi ti baptais raien. ³ Ba nonei e laba nena a provins i Judia me la pouts uana tara provins i Galili. ⁴ Kaba a maroro tega silaien e silaia i gusuna a provins i Samaria. ⁵ Ba nonei ena tukuna tara töa taun i Samaria te ngöeri Sikar i rehina a makumun tsiktsiki te halei e Jekop a pien i tanen e Josep. ⁶ A kioun ramun te hakahoein e Jekop i manasa e ka noa has. E Iesu e gegesi koku mei a toutatala a ngahangaha i tanen, ba nonei ena gumna i rehina a kioun ramun tara pal söasa.

⁷⁻⁸ U katunun tsitsilo i tanen ina hol lan tatsi kannou i taun. Ba töa taholuna i Samaria e la nama tegomi osul menaien tatsi ramun. Be Iesu e poeiena i tanen, “Hale mei lia tatsi ramun ego uei lia.” ⁹ Ba tahol e asingoto koruna me poeiena i tanen, “I me te kato koku uanen balö te rangate milia tu ramun? Alö a toun Jiu na lia a taholuna i Samaria.” (Nonei e mar ranga uu teka, taraha u Jiu ima ngil rai a tei Samaria. Na u Jiu mera tei Samaria ima hia lulu nai a manka i taren.) ¹⁰ Be Iesu e ranga palise nen me poeiena, “Alö ema atei silemi a ka a niga te ngilin hala nanei lö e Sunahan na esi te rangate neilö tatsi ramun. Alö sanena te atei sile moulia, balö te tatei rangata nem tatsi ramun i tar, balia te hale goi lö u ramununa tara nitöatöa!”

¹¹ Ba tahol e poeiena i tanen, “A tsi tsunono, alö ema ka memi ta kaan osul na kioun ramun teka e tsiruku koruna. Ime te lue moa lö nonei u ramununa tara nitöatöa teka?” ¹² Alö e pan bala nem e tuburara e Jekop, te hala railam a kioun ramun teka, na nonei na galapien na u sipsip na u bulmakau i tanen i uaua hobotoia tara kioun ramun teka?” ¹³ Be Iesu e ranga palise nen me poeiena, “A katuun te ua noua turu ramun teka ena maka lel nou. ¹⁴ Kaba a katuun te ua noua turu ramun te hala nagou lia ema antunan maka lel noi. Taraha, u ramun te hale gouien lia e here noi a kioun ramun i peisanen, te bututu sei nitöa menou a nitöatöa te ka nitöana.”

¹⁵ Ba tahol e poeiena, “A tsi tsunono halei meilia nonei u ramun teka balia tema tatei maka lel goi, ba tema tatei la hiton gumei romana teka tegomi osul ramun uu lia.” ¹⁶ Be Iesu e poeiena i tanen, “Alö gona ngöema a tson i tamölö ba limiou te lapouts uamuma i teka.” ¹⁷ Ba tahol e poeiena i tanen, “Alia u möa ta tson.” Be Iesu e poeiena, “Alö e ranga hamana nitoam te pei mena milö alö u möa ta tson. ¹⁸ Alö u hitöl mei a tolima a tson, na a tson te ka gono memölö tara pöata teka ema tson hamana uanei i tamölö. Alö e ranga hamanam.”

¹⁹ Ba tahol e asingoto koruna me poeiena, “Aa, alia e tara talagu, alö banei a propet. ²⁰ U tubumulam i hatsunoneia e Sunahan turu pokus te ka nama ili. Kaba alimiou u Jiu te peimiou u katuun eгина hatsunoneia e Sunahan i Jerusalem.”

²¹ Be Iesu e poeiena i tanen, “Hengo, a pöata e la nama ba u katuun tema antunan hatsunone roi e Sunahan turu pokus, na i Jerusalem. E möa.

²² Alimiou ema atei silemi a ka te hatsunonei mi

limiou. Kaba alam e atei silem a ka te hatsunonei mulam. Taraha, a katuun te lu pouts mera nei u katuun tere Sunahan e butu sila nama turu Jiu. ²³ Kaba a pöata e la nama na e tuku hakapa has ba u katuun hamana tere Sunahan te hatsunoneriou e Tamarara turu namnamei na tara nimana i tuinen. E Sunahan e sakiene a mar katuun teka tego hatsunono uu i tanen. ²⁴ E Sunahan u Namnamei, na katuun te singo uana i tanen ego singo hamana koruia i tuinen.”

²⁵ Ba tahol e poeiena i tanen, “Alia e atei silegu e Mesaia e la nama romana, a katuun te ngöeri e Kristo. Pöata te butu nen romana ba nonei te hatei ranoira a mamanaka hoboto.” ²⁶ Be Iesu e poeiena, “Alia nonei e Mesaia te ranga gono memölö.”

²⁷ Nonei tara pöata teka ba u katunun tsitsilo tere Iesu te tukur, nori i asingoto koru ni te ranga gono menai e Iesu a tahol. Kaba nori ima ran-gateien, “Aha te ranga gono sil memi lö a tahol teka, na aha te ranga nami limiou?” ²⁸⁻²⁹ Ba tahol e laba nena a tabelin osul ramun i tanen me lapouts uana tara taun mena hatei rena u katuun, “Alim-iou go la muma. Mi tareiam a katuun te hatei lalei lia a mamanaka hoboto tu kati lia i manasa. Nonei romana e Mesaia, a katuun te hahalose rara?” ³⁰ Ba u katuun e laba neruma a taun me la uarima tere Iesu.

³¹ Nonei tara pöata teka u katunun tsitsilo i tahulei e Iesu ega nou tatsi kannou. ³² Be Iesu e poeiena i taren, “E möa. Alia e ka megu a kannou tema atei sile milimiu.” ³³ Ba u katunun tsitsilo i tanen e hiarangrangatar me poeier, “Ta katuun toum romana e hale laleien ta kannou?”

³⁴ Be Iesu e ranga uana i taren me poeiena, “Alia e kato begu a toukui tere Sunahan te tula na moulia, e antunana tena kapa nen. Nonei a kannou i tar teka. ³⁵ Alimiou e pei miou, ‘A tohats patu a tsihou ba pöatan hamuna.’ Kaba lia e hatei ragou limiou, hula taraiam bate tara haniga miou bate tare hase miou temar tangoho hoboto uana a kui. ³⁶⁻³⁷ A katuun te harengena a kui e lu taleiena a hihol i tanen na e lu gögono sil hase nei a kannou, a kannouna tara nitöatöa teka nitöana. Ba u katunun leba na u katunun harengete sasaala hobotor te lu mena rien a hihol. Ba u raranga ti halani te butu hamana talana. ‘A töa katuun ena lebaleba nou ba tai tena harengeni nou.’ ³⁸ Alia e tula sil ragou ii limiou tegona gono mera mumei limiou u katuun te katsin hamana uar i tar. A palair u katuun i hala mam raien u raranga tere Sunahan, na limiou ena kato halesalemou u raranga tere Sunahan ba nori te tatei hamana hanigar.” ³⁹ A parpara a katununa tara taun i Samaria i hamanaia tere Iesu, taraha a tahol e hatei raien me poeiena, “Nonei e hatei namei lia a mamanaka hoboto tu kati lia i manasa.” ⁴⁰ Ba u katunura i Samaria emi butu ria tere Iesu, me rangate ren tego gamon ka buaien. Ba nonei e ka gono mera nen u huol u lan. ⁴¹ A pal para koru i hamana lel ia tere Iesu ti hengo menaien u raranga i tanen. ⁴² Ba nori e hateier nonei a tahol me poeier, “Alam u tania hamana uu tere Iesu tu hengo menai lam u ranga i tamölö. Kaba, alam e hamana koru lel talam, taraha alam e hengo peisa tala mula, na lam e atei sil hamana koru talem, nonei koru a katuun teka ti hala sile mei tegomi

luba menaien a man markato a man omi turu katunura i puta.”

E Iesu e kato haniga poutsu a töa pien tson

⁴³⁻⁴⁴ U huol u lan e kapa be Iesu e laba nena a taun teka me lauana i Galili. Nonei pouts has te ranga me poeiena, “A propet tere Sunahan ema kamenei ta solo i han pouts i tanen.” ⁴⁵ Kaba tara pöata te tukuien i Galili u katuun i sasaala koru meien, taraha nori i la has ma tara kannouna turu Paska turu Jiu i Jerusalem, na nori i tara haka-pama tara man mirakol te katoemen tara pöata tara kannou. ⁴⁶ Be Iesu e la pouts uana i Kena, a taun i Galili te hapalise men u ramun mena butun uainina. A pien tson tara tson tara gamman e kaia i Kapenium e ka mei a siki pan. ⁴⁷ A pöata te hengo naien e Iesu e laba nema i Judia me tukuna i Galili, ba nonei e lauana tere Iesu mena tahule nen tega la uaien i Kapenium batena kato haniga poutsena a pien i tanen, taraha nonei e katsin mate. ⁴⁸ Be Iesu e poeiena, “Tema tare mia limiou tu mirakol, alimiou ema hamana moui.” ⁴⁹ Ba tson tara gamman e ranga hataatagina me poeiena, “O Tsunono, alö go la boroboroma. A tsi pien i tar ena mots matena.” ⁵⁰ Be Iesu e poeiena i tanen, “Kopis poutsula i han, a pien i tamölö e töatöana na e niga poutsuna.” A tson teka e hamana korui u raranga tere Iesu ba nonei e la poutsuna i han i tanen. ⁵¹ Pöata te la noua len, ba u katunun kui i tanen e hitupali meren me poeier, “A pien i tamölö e niga poutsuna.” ⁵² Ba nonei e rangata ranen, “Saha pöata te tanian niga pouts meien?” Ba nori e poeier, “U hiski i tanen e tanian la puta tara 1 kilok i nolaha.” ⁵³ Ba tson e atei soköna, nonei lasi tara

pöata teka te rangama e Iesu bate poeiena, “A pien i tamölö e töatöana na e niga poutsuna.” Ba nonei a tson na hun katuun hoboto i tanen e hamana uar tere Iesu. ⁵⁴Nonei u hahuoluna u mirakol te katoeia e Iesu tara provins i Galili i murina te laba namen i Judia.

5

A katuun e niga poutsia i rehina a kioun ramun

¹ Ba i murinen ba u Jiu e katoeier a kannou pan turu lotu i taren, be Iesu e la uana i Jerusalem. ² Na tara Tamana Pan turu Sipsip i Jerusalem e kamei a töa kioun ramun ti ngöei turu HaHibru i Betesda. Na tolima a luman oho i hahisi a kioun ramun teka. ³ A makum teka e kamei a katuun a parpara ti ka mei u siki i opöia tara man luman oho teka, u matakiou, na u mou korus nu matekata. Nori i hahalosi tegi kilata menai u ramun. ⁴ Taraha, tara man töa man pöata a angelo tara Tsunono e roron kouluma batemi hula kilatanaiena u ramun tara kiou. Ba esi te tsiruku mamia tara ramun i murina te kilateien a angelo nonei has te niga pouts. ⁵ A töa katuun te kaia teka e solon kamei a siki e antunaia turu 38 u hiningal. ⁶ Pöata te tareia e Iesu te opö uaien nonei has e atei sil sokui te solon ka menaien a siki, ba nonei e poeiena i tanen, “Alö e ngil hasem alö gi kato haniga poutseiou?” ⁷ Ba katuun e poeiena i tanen, “O Tsunono, alia u möa ta katuun tega lu menai lia tara ramun tara pöata te bututu sei nama u ramun te kilaterien. Pöata te takei silegia lia tego la uu lia tara ramun ba tana katuun tena tasu mam tsiponina.” ⁸ Be Iesu e poeiena i tanen, “Takei balö te söatem u holholasa i tamölö balö te lam.” ⁹ Ba tara tsi pöata puku

has teka ba katuun e niga poutsuna me söatena u holholasa i tanen me tataalana. A ka teka e butuia turu Lan u Göagono turu Jiu. ¹⁰ Ba pal kapan turu Jiu e poeier tara katuun te niga pouts, “U Lan u Göagono i romana. Alö e pekoeiem a lo turu lotu te söata mena milö u holholasa i tamölö turu lan teka.”* ¹¹ Ba nonei e ranga palis uana i taren me poeiena, “Kaba a katuun te kato haniga poutse namou lia te pei nama i tar, ‘Alö go söati u holholasa i tamölö balö te lam.’” ¹² Ba nori e rangate ren, “Esi temar ranga uanama teka?” ¹³ Kaba a katuun te niga pouts ema atei silei e si, taraha e Iesu e la hatutua i gusur u katuun u parpara koru. ¹⁴ Ba i murinen be Iesu ena sabiena a katuun teka iahana a Luman Lotu Pan me poeiena i tanen, “Tara, alö e niga pouts talam. Alö goma katokato lelei ta markato ta omi bate möa nou ta ka ta omi koru tega butuia i tamölö.” ¹⁵ Ba katuun teka e lana mena hatei la ranei u Jiu, e Iesu te kato haniga poutse men. ¹⁶ Ba u Jiu e tanian korupakö ner e Iesu, taraha nonei e kati u mirakol turu Lan u Göagono. ¹⁷ Kaba e Iesu e palis raien me poeiena, “Te kato haniga poutse gula lia a katuun e haröto nena e Tamar e kui noana na lia e kui noa hasegu a toukui teka.” ¹⁸ Ba turu mar ranga teka ba u Jiu e tagala sil koruer tegi kato hamate menaien e Iesu, taraha nonei e peki a lo i taren turu Lan u Göagono na nonei e pei hasi e Tamanen e Sunahan. Tara markato tala teka, nonei e hiapöpopo gono mena e Sunahan.

A nitsunono tere Iesu

* **5:10:** Te söata menanei a katuun u holholasa i tanen turu Lan U Göagono, u Jiu e poeier, nonei e kui noahasina.

¹⁹ Be Iesu e poeiena i taren, “Alia e hatei hamana koru ragou limiou, a Pien ema antunan kato pepeisa nanei ta ka. E kato lasena a ka te tarenen te katoena e Tamanen, taraha a ka te katoena e Tamanen, nonei e kato hase nouen. ²⁰ E Tamar e ngil koruena a Pien i tanen, bate haröte neien a mamanaka hoboto te katoe nen. Na nonei e haröte noien romana a man mirakol te pan bala nena u mirakol teka, ba limiou te asingoto koru mou. ²¹ U mana koru, te hatakei rena e Tamar u katuun tara tou mate i taren bate hala raneien a nitöatöa, alia a Pien i tanen e kato has uagou iesana bate hala has nagou a nitöatöa turu katuun te ngil raiegu lia. ²² E Tamar ema one nei ta katuun kaba i halei a toukui hoboto teka a Pien i tanen tega ona meraien u katuun. ²³ Ba u katuun te tatei hapaner a Pien temar hapan has meraien e Tamaren. E si tema hapane nei a Pien ema hapan hase nei e Tamanen te tula namen.” ²⁴ Be Iesu e poeiena, “Alia e hatei hamana ragou limiou, a katuun te hengoena u raranga i tar na te hamana hasena e Sunahan te tula namoulia e ka mena a nitöatöa te ka nitöana. Nonei ema la noi turu kout tere Sunahan. E manana, nonei e ka halhal ba mamin a nitöatöa tere Sunahan na e herei a katuun a mate. Kaba nonei e laba nema a tou mate teka na e aroho hakapa uu tara nitöatöa tere Sunahan. ²⁵ Alia e hatei hamana koru ragou limiou, i romana na i murimuri has, u katuun tema ka meri a nitöatöa teka e hengoe riou u raranga tara Pien tere Sunahan, ba katuun te hengo hanigana e lue nou a nitöatöa teka. ²⁶ E Tamar, a mouna a nitöatöa, na nonei e hala hasei a Pien i tanen a nitagala tega mounaia a nitöatöa i tanen. ²⁷ Na e hala haseien a nitsunono tego

ona meraien u katuun, taraha nonei te butun Katunuma. ²⁸⁻²⁹ Alimiou ema asingoto namoi a ka teka, taraha a pöata te la nama ba u mate hoboto te ka ria tara man kahokaho te hengoe riou u raranga i tar, ba nori te takei pouts riou. U katuun ti kato haniga e hatakei pouts sil raroui a nitöatöa te ka nitöana, na u katuun ti kato homi e hatakei pouts sil raroui tegina lu menaien u nihahuna.”

U katuun te hatei ner e Iesu

³⁰ Be Iesu e ranga lenina tara pal kapan turu Jiu me poeiena, “Alia ema katoegi ta ka turu ngil peisa i tar. E möa. Alia e mar ona has meragi u katuun temar hatei mena ii lia e Sunahan. Na temar ona uagu lia e matsköna, taraha alia ema kato megi u ngil peisa i tar. E möa. Alia e markato has uagu temar ngil uana e Sunahan te tula na moulia.

³¹ “Te hatei peisa nagoua lia a peisar, u katuun ema hamane roi lia. ³² Kaba e Tamar e hatei has nanou lia tara pöata teka, na lia e atei silegu u raranga i tanen e manana.

³³ “Alimiou u tula ramula u katuun tegina rangata menaien e Jon, na nonei e hatei hamana naiou lia. ³⁴ Alia ema hakö gia turu raranga tara katuun tuun. Kaba, alia e hatei sil tuun rahi limiou u ranga tere Jon tego hamana mena mien limiou na tego lu pouts menai limiou e Sunahan. ³⁵ E Jon e kulupu halesala herei u lam, ba limiou e sasaala miou me masa koru memiou u alesala i tanen.

³⁶ “Kaba a ka te pan bala nena e Jon e hatei has nanou lia. E Tamar e hanigein tego kui menai lia a man mirakol. Na man mirakol has te katoe gulia e haröto nena e Tamar has te tula na moulia. ³⁷ Na e Tamar has te hala na moulia, nonei e hatei nena

te mana uana u raranga i tar. Alimiou uma mala hengoemi a rungnen na limiou uma mala tara hasemi a matanen. ³⁸ Na u raranga tere Sunahan ema ka neia i torimilimiou, taraha alimiou ema hamane milia, alia tu lama i tanen. ³⁹ Alimiou e rōto nitōa namiou u Buku u Göagono, taraha alimiou e poeimiou nonei te hala ranoui limiou a nitōatōa te ka nitōana. U Buku u Göagono e hatei noahas na nou lia. ⁴⁰ Kaba alimiou e raman la uamuma i tar bate mi luemiou a nitōatōa te ka nitōana.

⁴¹ “Alia ema hakats nagi tegi hapan menai u katuun alia. ⁴² Kaba lia e atei silegu a torimilimiou ema ngile nei e Sunahan. ⁴³ Alia u la mema a nitsunono tere Tamar, na limiou ema lu mena milia i tamilimiou. Kaba te la menama romana ta tōa ta katuun a nitsunono peisa i tanen, alimiou e lu mena moien i tamilimiou, noahasina te möa nen ta nitsunono tere Sunahan. ⁴⁴ Alimiou e mar hamana uamou i me te lu mena mi limiou a nipan te hala nena a taina a katuun, ba limiou tema sake mi a nipan te la nama tere Sunahan a tōa puku tega kato hapan raiou limiou.

⁴⁵ “E möa tu poeiam alia te kout ragoua limiou i matana e Tamar. E möa, E Mosis te kout ranou limiou, nonei e Mosis ti hake mia limiou u nihamana i tamilimiou. ⁴⁶ Te hamane mia limiou e Mosis, alimiou go hamana hase moulia. Taraha, nonei e koloto sileiou lia turu Buku u Göagono. ⁴⁷ Kaba tema hamane milimiou a ka te koloto naien, ga ime temar hamana menamoi limiou u raranga i tar?”

*E Iesu e hanour u 5,000 tara katuun
(Matiu 14:13-21, Mak 6:30-44, Luk 9:10-17)*

¹ I murinen be Iesu e la pouts uana i hapalana a Ramun a Perperere i Galili, te ngö haseri i Taibirias. ² U katuun u para koru i kukutieien, taraha nori i tara a man mirakol te katoeien turu katuun ti kamei a man siki. ³ Be Iesu e gamon tataala seina tara tsi pokus me gum gono merena u katunun tsitsilo i tanen. ⁴ U Paska, a kannou turu Jiu, e sulusuku hamanasa. ⁵ Be Iesu e hula tarana me tara rena u katuun u parpara koru i la uama i tanen, ba nonei e poeiena tere Pilip, “Ime te hole rouara ta beret te hanou raroui u katuun teka?” ⁶ Nonei e mar ranga uu teka tega torohana menaien e Pilip. Nonei e atei sil mami a saha a ka tego katoeien. ⁷ Be Pilip e ranga palise nen me poeiena, “A hiholuna tara töal a tsihou* ema antunan hol hase nei ta beret ba u katuun te tatei luer a mats tabubu.” ⁸⁻⁹ Ba töa katunun tsitsilo i tanen, e Endru e toulana e Saimon Pita, e poeiena i tanen, “A töa pien tson e kana teka, e ka mena a tolima a bali beret na huol a iena. Kaba ema antuna noi tara katuun a parpara koru teka.” ¹⁰ Be Iesu e poeiena, “Na hagum raiam u katuun.” E kamei u garas u para tara makum ti kaien. Ba u katuun e gumur, a pal tson na touhaliou has na u hihase tara pal tson puku e antunaia turu 5,000. ¹¹ Be Iesu e luena u beret me haniga uana tere Sunahan me molamola raneien u katuun ti gum. Me kato has menanei u iena iesana, ba nori e mar luaier timar ngil hapopo uaien. ¹² Pöata ti nou hantuna hakapaien, ba nonei e ranga meraiena u katunun

* **6:7:** U HaGrik hamatskö: *200 denarius*: A hiholina turu 200 u lan.

tsitsilo i tanen me poeiena, “Gone muma a mats nouba, ara gima kato baba naien.” ¹³ Ba nori e goner a man nouban beret, me ongo hasaputer a maloto na huol a kalobaka tara man nou ba turu katuun. ¹⁴ Pöata ti tareia u katuun a manka teka ba nori e poeier, “U mana koru lahas, nonei koru a propet tega la uama tara han i puta.” ¹⁵ Pöata te atei sileia e Iesu u katuun emi katsin pile kap naien bate hakinge ren, ba nonei e la pepeisa uana tara pokus.

*E Iesu e tataalaia i ieluna u ramun
(Matiu 14:22-33, Mak 6:45-52)*

¹⁶ Pöata te lahi ia ka, ba u katunun tsitsilo tere Iesu e gala uar i ramun. ¹⁷ Ba nori e osa ria tara tolaala me lauar i hapalana ramun tara taun i Kapenium. A ka e bong hamanasa kaba e Iesu ema la noa ua mei i taren. ¹⁸ A lomolomo e takei hatagala koru ma ba a ramun e posana. ¹⁹ Pöata ti sua hakape len a tolima a kilomita tsi a tönomo ba nori e tareier e Iesu e tataala ma ieluna u ramun me la uanama tara tolaala. Nori ima marei ien ba nori e matout korur. ²⁰ Ba nonei e poeiena i taren, “Alia ba, alimiou goma matoutmi.” ²¹ Pöata ti hengo marei ien e Iesu ba nori e masa korur me hasesei tuun siler tegi hosa menaien e Iesu tara tolaala. Ba nonei tara tsi pöata puku has ba tolaala ena butuna tara han ti la uaien.

A Beretina i Kolö

²² Ba turu hamahö u katuun ti ka ma i hapalana a ramun i tari u katunun tsitsilo i ka puku las mei a töa puku a tolaala. Nori i tara hasi e Iesu ema osa gono merai u katunun tsitsilo i tanen tara tolaala kaba u katunun tsitsilo i tanen i la pepeisala. ²³ A

man tolaala ri Taibirias i la hasukusuku uama tara makum ti nouia a beret te haniga naia a Tsunono tere Tamanen ba u katuun e töan noue ren. ²⁴ Ba pöata ti atei sileia u katuun e Iesu na u katunun tsitsilo i tanen ima ka ii, ba nori e osa ria tara man tolaala teka me sake lila e Iesu i Kapenium.

E Iesu a kannouna tara nitöatöa

²⁵ Pöata tina sabieien e Iesu i hapalana a ramun, ba nori e rangatar me poeier i tanen, “Tson Hihatuts, alö u la uama teka i hangisa?” ²⁶ Be Iesu e poeiena i taren, “Alia e hatei hamana koru ragou limiou, alimiou ema sake memi lia tu tara mena mei limiou a man mirakol i tar. E möa, alimiou e sake memu mei lia tu hanou hamasul mera mei lia alimiou. ²⁷ Alimiou goma kui silemi a ka te tatei putakana. E möa. Alimiou go kui sileiam a ka te niga nitöana, a ka te hala nena a nitöatöa te ka nitöana. Alia tu butun Katunuma e hala ragoui limiou a ka teka, taraha e Tamar e Sunahan e hanige noulia.”

²⁸ Ba nori e poeier i tanen, “Aha tego katoi lam tego kato menai lam a man toukui tere Sunahan?”

²⁹ Be Iesu e ranga palis uana i taren me poeiena, “A toukui tere Sunahan e markato uana teka, alimiou go hamana mia tara katuun te tula na men.”

³⁰ Ba nori e poeier i tanen, “U saha u hiharöto te haröto namoulö ba lam te taram bate hamane mölö? A saha ka te kate mölö? ³¹ U tubumulam i noui a ka ti ngöei a Mana, tara pöata ti kaien tara makum a palaka. U Buku u Göagono e poe hasena, ‘Nonei e hala raien a kannou te lama i Kolö.’” ³² Be Iesu e poeiena i taren, “U mana koru alia e hatei ragou limiou, e Mosis ema hala nai a kannou te lama i Kolö turu tubumilimiou. E möa. E Tamar

te hala na men. Na nonei e ngilin hala has ranei limiou a kannou hamanana i Kolö. ³³ Nonei a kannou hamana tere Sunahan teka e lama i Kolö na e hala nena a nitöatöa turu katunura i puta.”

³⁴ Ba nori e poeier, “O Tsunono, alö go hala nitöa ramei lam a kannou teka.” ³⁵ Be Iesu e poeiena i taren, “Alia nonei a kannou te hala nena a nitöatöa. E si te la uanama i tar ema tatei bes noi na esi te hamanana i tar ema tatei maka noi. ³⁶ Kaba lia e hatei ragou limiou, alimiou u tare moulia kaba limiou ema hamana noahas mi. ³⁷ U katuun hoboto te hala mera namei e Tamar i tar e la uarima romana i tar. Alia ema antunan hakopise goi esi te la uanama romana i tar. E möa. ³⁸ Alia uma la sile mei i Kolö tegomi kato menai a manka turu ngil peisa i tar. E möa. Alia u la silema tegomi kato menai lia u ngil tere Sunahan te tula na moulia. ³⁹ Na nonei teka a manka te ngilena e Sunahan: nonei e ngilena alia goma hatie ii ta töa ta katuun te hala na men ba lia te hatakei pouts ragoen romana tara tou mate tara kapakapana pöata. ⁴⁰ Nonei koru a ka te ngilena e Tamar, u katuun hoboto te tare riou lia na te hamana uar i tar, nori egina lueiou a nitöatöa te ka nitöana. Na lia e hatakei pouts ragoen romana tara tou mate tara kapakapana pöata.”

⁴¹ Ba pal kapan turu Jiu e hiararanga siler e Iesu te pei menaien, “Alia nonei a kannou tu lama i Kolö.” ⁴² Ba nori e poeier, “A katuun teka nonei e Iesu, a pien tson tere Josep. Ara e atei silera e tamanen ne tsinanen. Ime te markato uanen ba nonei te poeiena, ‘Alia u lama i Kolö?’ ” ⁴³ Be Iesu e poeiena i taren, “Möa tu hiararanga hapara mia i gusumilimiou. ⁴⁴ A katuun ema antunan la peisa

mena mei u ngil tanen, e Tamar noahas tena hale noien u hakhakats u niga ba nonei tena la nama i tar. Na lia e hatakei poutse goen romana tara tou mate tara kapakapana a pöata. ⁴⁵ U propet† i koloto has naien turu Buku u Göagono i manasa me poeier, ‘E Sunahan e hatuts hoboto ranoen romana.’ Na u katuun hoboto te hengo hanigeier u hihatuts tere Tamar e la uarima romana i tar. ⁴⁶ Ema ranga nanei ta töa e tarama tere Tamar. E möa. Esi puku te lama tere Sunahan, nonei puku te tarama i tanen.‡

⁴⁷ “U mana koru alia e hatei ragou limiou, a katuun te hamanana e ka menou a nitöatöa te ka nitöana. ⁴⁸ Alia nonei a kannou na tara nitöatöa. ⁴⁹ U tubumilimiou i noui a ka ti ngöei a Mana tara makum a palaka. Kaba nori i mate noahas. ⁵⁰ Kaba nonei teka a kannou te lama i Kolö, na katuun te noue nen e ma antunan mate noi. ⁵¹ Alia nonei a kannou te hala nena a nitöatöa te lama i Kolö. E si te nouna tara kannou teka e ka me nou a nitöatöa te ka nitöa nou. Na kannou te hala negu lia tena ha töatöa ranou u katunura i puta, nonei u tuenrei i tar.”

⁵² Ba pal kapan turu Jiu e hiararangar me poeier, “Ime te markato uanen ba katuun teka te hanou ranoira u tuenrei i tanen bara te noue roen?” ⁵³ Be Iesu e ranga palis ranen me poeiena, “U mana koru, tema nou moilimiou turu tuenrei i tar na tema ua moilimiou turu rahatsing i tar alimiou ema antunan töatöa moi. Na lia e hatei hamana koru ragou limiou, e kato has uana iesana tara katuun te hahamana na i tar, alimiou

† 6:45: A pal ranga teka e la nama turu buku tere Aisaia 54:13.

‡ 6:46: E Iesu e ranga pouts nena a peisa nen.

go lu mena milia i torimilimiou, Alia tu butun Katunuma. Te möa nen, ba limiou tema antunan ka memoi a nitöatöa te ka nitöana. ⁵⁴ A katuun te nouena u tuenrei na te ue iena u rahatsing i tar e ka menou a nitöatöa te ka nitöana. Na lia e hatakei poutse goen romana tara tou mate tara kapakapana pöata. ⁵⁵ Taraha, u tuenrei i tar a kannou hamana na u rahatsing i tar nonei u ramunun ua hamana. ⁵⁶ A katuun te nouena u tuenrei i tar na te ue iena u rahatsing i tar e ka nitöana i tar, na lia e ka nitöa has gia i tanen. ⁵⁷ E Tamar te töatöa nitöana te tula na moulia. Na lia e töatöa sila has gia tere Tamar. Bara! Esi te noue noulia ena töatöa sila has noa i tar. ⁵⁸ Nonei a kannou teka te ranga nagula lia te lama i Kolö. Ema kato uanei tara kannou ti nouia u tubumilimiou, kaba nori i mate noahas. E möa. A katuun te nouena a kannou teka e töatöa nitöa nou.” ⁵⁹ E Iesu e katoeia u ranga teka te hihatuts ien iahana luman lotu tara taun i Kapenium.

U rarangana tara nitöatöa te ka nitöana

⁶⁰ A pöata ti hengoeia u katunun tsitsilo i tanen u ranga teka ba nori e poeier, “U hihatuts teka e tagala koruna. Esi te hanige noen?” ⁶¹ Kaba e Iesu e ateia i tori nen, u katunun tsitsilo i tanen ima hanigei u ranga te katoeien, ba nonei e poeiena, “Alimiou e raman hengoe miou u raranga teka? ⁶² Ga te tare moua limiou, Alia tu butun Katunuma e la pouts uagou i Kolö tu lama lia? ⁶³ U Namnamei puku lahas te hala nena a nitöatöa. U tuenrei puku ema antunanei. U raranga te hatei ragu lei lia limiou, nonei u rarangana turu namnamei, na nonei te hala ranei limiou a nitöatöa. ⁶⁴ Kaba palair u

katuun i gusumilimiou e hahamana noar.” E Iesu e atei sil mam noa hasir u katuun ti hahamana naien, na esi tegana hala naien turu katuun ti korupakö naien. ⁶⁵ Ba nonei e poeiena, “Nonei te hatei sila ragula lia limiou, a katuun ema antunan la peisa ua namei i tar e antunana te haniga nena men e Tamar.” ⁶⁶ Tara markato teka ba para koru a katuun turu katuun ti kukute la naien e talous ba naren mema kute lele rien. ⁶⁷ Be Iesu e rangata rena a maloto na huol a katunun tsitsilo i tanen me poeiena, “Alimiou has e ngilin la miou?” ⁶⁸ Be Saimon Pita e ranga palise nen me poeiena, “O Tsunono, alam e la uamou teresi? Alö peisa te ka mem u ranganata tara nitöatöa te ka nitöana. ⁶⁹ Na lam e hamanam na e atei sil hasem alö a Pien a Göagono te tula nema e Sunahan.” ⁷⁰ Be Iesu e ranga palis ranen me poeiena, “Alia u hopö kap riou limiou a maloto na huol a katuun. Kaba a töa i tamilimiou a katuun tere Satan.” ⁷¹ Nonei e rangein e Judas a pien tere Saimon Iskariot. E manana, nonei a töa tara maloto na huol a katunun tsitsilo tere Iesu, kaba nonei tena harötein e Iesu turu katuun ti korupakö naien.

7

E Iesu na u toulanen

¹ Ba i murinen be Iesu e hula lana iahana a provins i Galili. Nonei ema ngilin lauui tara provins i Judia, taraha a pal kapan turu Jiu i Judia i sake lan ta maroro tegi mar atung hamate sila menaien. ² A pöata tara Kannouna tara Taluhu e suku suku hamanasa. ³ Ba u toulana e Iesu e poeier i tanen, “La ban a han teka balö te lauam i Judia ba u katunun tsitsilo i tamölö te tatei tara haseier

a man mirakol te katoe mölö, ⁴ taraha, a katuun te ngilena u katuun hoboto egi atei sileien ema tatei kui momous nei. Te antunan kato hamana namia lö a man mirakol, ba lö te katoe men i matar u katuun hoboto!” ⁵ U toulana e Iesu i mar ranga uu teka, taraha nori ima hamaneien. ⁶ Be Iesu e poeiena i taren, “A pöata i tar ema butu noa nei, kaba a mamana pöata a man pöata i tamilimiou. ⁷ U katuun i puta ema antunan omi rari limiou, kaba nori e omie riou lia, taraha alia e hatei ragien te omi uana a markato i taren. ⁸ La mula tara kannou. Alia ema antunan la noagi tara kannou, taraha a pöata i tar ema butu hakapa noa nei.” ⁹ Nonei e ranga hakapa uu teka ba nonei e gamon kana i Galili.

E Iesu e la uu tara kannouna tara man taluhu

¹⁰ Ba i murina ti la hakapaia u toulanen tara kannou, be Iesu e la hasina. Kaba nonei ema la silaia ti kaia u katuun. E möa. Nonei e tataala hamous koru. ¹¹ U Jiu i sake la naien tara kannou me poeier, “Ime te ka nen, alimiou e tara hase mula e Iesu?” ¹² Iahana u gonogono u katuun i hahasi sil hoboti e Iesu. A palai i taren i pei, “Nonei a katuun a niga,” ba palai te poeier, “E möa. Nonei e gamo rena u katuun.” ¹³ U katuun ima ranga halakasa nai a solona e Iesu turu katuun hoboto taraha, nori i matoutir a pal kapan turu Jiu. ¹⁴ A kannou e solon la hagusgusuna noa be Iesu e la uana tara Luman Lotu Pan ba nonei ena tanian hatuts rena u katuun. ¹⁵ A pal kapan turu Jiu i asingoto koruni a man ranga i tanen me poeier, “Nonei e mar atei sil menanei a manka teka ime? Nonei ima mala hatutse ii.” ¹⁶ Be Iesu e poeiena i taren, “U hihatuts teka ema ka uanei

i tar. U hihatuts teka e la nama tere Sunahan, nonei te hala na moulia. ¹⁷ A katuun te ngilin kukuteiena u raranga tere Sunahan e atei sil peise nou u hihatuts teka e la nama tere Sunahan tsi e la peisa nama i tar. ¹⁸ A katuun te ranga peisa mena u ngil i tanen e ngilin hapan nena a peisanen. Kaba a katuun te ngilin hapan nena a katuun te haleie men, e ranga hamanana, nonei ema gamo nei. ¹⁹ E Mosis e hala rai limiou a man Lo tere Sunahan. Kaba e möa ta töa i tamilimiuu tega kukutie a man Lo teka. Aha te sake silemi limiou ta maroro tego mar atung hamate memi limiou alia?” ²⁰ Ba u katuun e ranga palise ren me poeier, “Alö e momolö korum! E möa ta katuun tega ngilin atung hamate naiou lö!” ²¹ Be Iesu e ranga palis ranen me poeiena, “Alia u katoe u töa u mirakol ba limiou ema hanigami, taraha alia u katoeien turu Lan u Göagono. ²² E Mosis e hala rai limiou a markato na te hapö uar na* limiou e katoemen turu lan u Göagono, taraha a Lo tere Mosis e ranga nena a katuun ega katoe a ka teka, noahasina te butunen turu Lan u Göagono. (A markato teka e taniama turu tubumilimiuu i mam tara pöata tere Mosis.) ²³ Te butuna a pöatan hipö teka turu Lan u Göagono, alimiuu e kato noahase men, taraha alimiuu ema ngilin peko nami a man Lo tere Mosis. Ge hana balimiuu te raharahe moulia te kato haniga pouts menagi lia a tuenreina a katuun turu Lan u Göagono? ²⁴ Alimiuu goma onemi temar tara uana a katuun. E möa. Alimiuu go oneiam a ka

* **7:22:** Turu hatöalina u lan ti poseia a pien ba nonei te hapö ner. Noa hasina te lame neien u lan u Göagono, a ka teka i kato noahasi, nori i kute hatagala korui u Lo tere Mosis.

tara maroro a matskö.”

E Iesu nonei e Mesaia?

²⁵ Ba palair u katuun ti kaia i Jerusalem e rangar me poeier, “A katuun teka te ngilin atung hamate ner? ²⁶ Tara! Nonei e ka noa hasina na nonei e rangana turu katuun hoboto, kaba pal kapan ema hapiou narien! A pal kapan toum e atei siler nonei hamana e Mesaia, a katuun te hopö kapiin e Sunahan? ²⁷ Pöata tena la nama romana e Mesaia, ara ema atei sile roi ime te lana men.” ²⁸⁻²⁹ Be Iesu e ranga hapan koru mena te hihatuts uen tara Luman Lotu Pan be poeiena, “Alimiou e poe hamana korue miou alimiou e atei sile moulia na ime tu la malia? Alia uma la peisa memei u ngil i tar, kaba esi te haleie moulia te manana, kaba limiou ma atei sile mien. Alia e atei sil megien. Taraha, alia u lama i tanen na nonei e tula namoulia ba lia e laguma.” ³⁰ Ba nori e pats pile kap naren, kaba nori ima pile naien, taraha a pöata i tanen e ka noana. ³¹ Kaba u katuun u parpara i hamanaia i tanen ba nori e poeier, “Te la nama romana e Mesaia, nonei e kato hase nou tu mirakol tu parpara bate kato salsaluhenu te markato uana a katuun teka?”

A pal kapan i torohanan pilein e Iesu

³² U Parasi i hengen timar hahasi sil menai u katuun e Iesu, ba nori na u tsunono pan turu lotu e tula rarima u polis tara Luman Lotu Pan egimi pile kap naien. ³³ Be Iesu e poeiena turu katuun, “Alia e gamon ka gono mera gou limiou, balia te la pouts uagou tara han tu la ma lia. ³⁴ Alimiou e sake mou lia romana, kaba limiou ema sabie moi lia. Na han tena ka goua lia, alimiou ema antunan la uamoi i

tanen.” ³⁵ Ba pal kapan turu Jiu e hiarangrangatar me poeier, “Ime te katsin la uana a katuun teka bara tema tatei sabie roien? Nonei e katsin la toum uana turu Jiu te ka kalakala ria turu han i lehana batena hatuts ranoien na u katuun has tema Jiu ri. ³⁶ I me temar mouna uana u ranga i tanen te poeiena, ‘Alimiou e lagi sakesake mou lia romana kaba limiou ema sabie moi lia,’ na ‘ime te la uagu lia, alimiou ema antunan la mumei romana?’”

A ramun olo na tara nitöatöa

³⁷ Turu lan te kapaia a kannou, nonei u lan u kapan koru. Ba e Iesu e tuoluna me ranga hapan koru uana turu katuun me poeiena, “Te maka mia lö, la uama i tar batemi uam. ³⁸ Taraha, u Buku u Göagono e poeiena a katuun te hamanana i tar e here noi a ramun te olona, ba nonei te hala nena a nitöatöa turu katuun.” ³⁹ E Iesu e rangein u Namnamei tere Sunahan tega hala nema e Sunahan turu katuun ti hamanaia tere Iesu. Kaba e Sunahan ema hala noa namei u Namnamei i tanen, taraha nonei ema hapan noe nei e Iesu i Kolö.

U katuun i hula hakatsin e Iesu

⁴⁰ Pöata ti hengoeia u katuun u raranga teka ba palai e poeier, “Nonei e Iesu, a propet tega lama.” ⁴¹ Ba palai e poeier, “Nonei e Mesaia.” Kaba palai i poe, “E Mesaia egoma la meia i Galili. E möa. ⁴² U Buku u Göagono e poeiena e Mesaia ega tuhanaia tara pala tere Devit. Nonei gi poseia i Betlehem, a taun te kaia e Devit.” ⁴³ Ba e ka tala mena u huol u ranga te lu kateir u katuun. ⁴⁴ A palair u katuun

i ngilin pile kap naien, kaba e möa ta töa tega pile kap naien.

A pal kapan turu Jiu i hahamana

⁴⁵ Ba u polis tara Luman Lotu Pan e la pouts uar turu pris pan na u Parasi, ba nori e rangata raier u polis me poeier, “Aha tema lu memu mei limiou e Iesu?” ⁴⁶ Ba u polis e poeier, “E möa ta katuun tega mar ranga uu temar ranga uana a katuun teka.” ⁴⁷ Ba u Parasi e poeier, “Nonei e gamo ranamou limiou?” ⁴⁸ E möa ta töa tara pal kapan tsi ta töa turu Parasi ega hamana uu i tanen. ⁴⁹ Kaba u katuun te hamana uar i tanen, nori e tutu ba ner a man Lo tere Mosis. E Sunahan e hahuna ranouen romana.” ⁵⁰⁻⁵¹ Be Nikodemus a töa Parasi, tena tara has bi e Iesu e rangata ranen, “A Lo i tarara e poeiena ara gima hala pinopino nai a nihahuna tara katuun. Aragi hengo mam buia i tanen bara te atei silera aha koru te katoeien.” ⁵²⁻⁵³ Ba nori e rangate ren, “Alô a toun Galili has? Na taratara hanigei u Buku u Göagono balö te tara peisa mou, e möa ta propet ga butuma i Galili.” Ba u katuun e taker me la kalakalar.

A tahol te kaka gono mei a taina tson

8

¹ E Iesu e la uu turu Pokus tara Ruein Olip. ² Tara bongbong koru ba nonei e la pouts uana tara Luman Lotu Pan. Ba u katuun e gono hoboto ua rima i tanen ba nonei e gumuna me taniaan hihatutsna i taren. ³⁻⁴ U tson hihatuts tara Lo na u Parasi i lamema a töa tahol ti sabie men te kaka gono meien a tson.* Ba nori emi hatuolerien

* **8:3-4:** A tahol a lulu tson.

i matar u katuun me poeier tere Iesu, “O Tson Hihatuts, u katuun e sabie rima a tahol teka bate kaka gono meiena a tson. ⁵ A Lo tere Mosis e poeiena aragi titi hatu a mar tahol teka e antunana te mate nen. Aha te poeie mölö?” ⁶ Nori i mar ranga uu teka taraha, nori i kato sili ta ka tegi mar kout menaien e Iesu, ba nori e torohaneren. Be Iesu e turu putana me koloto nena a kabelenen turu tsiktsiki. ⁷ Nori i hasoso sil korui tega ranga uen ba nonei e tuol sei poutsuna me poeiena i taren, “Bara, esi i gusumilimiou tema mala kato homii e tatei ti mam nena a hatu tutuun tara tahol teka.” ⁸ Be Iesu e turu puta poutsuna me koloto lel nena a kabelenen turu tsiktsiki. ⁹ Pöata ti hengoeien u ranga teka ba nori e tia hihieser, u tson pan ti tia mam ba u hitots e kute raren. E Iesu puku na tahol ti ka pepeisaia u gusura u katuun, na tahol e tuol noahas ia i matana e Iesu. ¹⁰ Be Iesu e tuol hamatskö poutsuna me poeiena tara tahol, “Me te ka ria u katuun temi kout na lilölö? E möa koru ta töa tega ka bate kout nanölö, tsime?” ¹¹ Ba tahol e poeiena, “A tsi Tsunono, e möa ta töa.” Be Iesu e poeiena i tanen, “Na lia has ema ka megi ta ka tegi hahune silei lö. La tala, ba lö tema kato homi lelmi.”

E Iesu u ualesala

¹² E Iesu e ranga lel uu turu katuun me poeiena, “Alia u ualesala te alesala uana turu katuun i puta. Esi te kukutie noulia ema tataala lel noi turu kuhil kaba e ka menou u alesalana tara nitöatöa hamana.” ¹³ Ba u Parasi e poeier i tanen, “Alö e hatei pepeisa nem a peisamölö. U ranga i tamölö ema mana nei.” ¹⁴ Be Iesu e poeiena i taren, “E manana, alia e hatei negu a peisar. Kaba u ranga

i tar e mana noa hasina. Taraha, alia e atei silegu ime tu la malia na ime te la has uagou lia. Kaba limiou ema atei silemi ime tu la malia na ime te la has uagou lia. ¹⁵ Alimiou e one mia a katuun tara markatona i puta, kaba alia ema onegi ta katuun. ¹⁶ Te ona hase goua lia a tana katuun, ba u raranga i tar te manana taraha, alia ema kato pepeisegi a ka teka. E möa. Kaba e Tamar te tula na moulia, nonei e kui gono has menou lia. ¹⁷ Tara Lo i tamilimiou i koloto hasiin, tara nihanhana tara huol a katuun, ba u raranga i taren te manana. ¹⁸ Na lia e hatei negu a peisar ne Tamar e hatei has nanou lia. Nonei te tula na moulia.” ¹⁹ Ba nori e poeier i tanen, “Ime te kana e tamamölö?” Be Iesu e poeiena, “Alimiou ema atei sile milia na limiou ema atei sil hasemi e Tamar. Tego atei sil memi limiou alia, alimiou e antunan atei sil hasemiou e Tamar.” ²⁰ E Iesu e mar hihatuts uu teka tara Luman Lotu Pan i rehina a makum te hakeria a moni. Kaba e möa ta katuun tega pile kap naien, taraha a pöata i tanen ema butu noua ii.

Iesu e hahatei mamin a nimate i tanen

²¹ Be Iesu e pei lelana i taren, “Alia e laba nagou romana a han teka ba limiou tena sake moulia. Kaba limiou e mate gono memou a man markato a man omi i tamilimiou. Na limiou ema antunan la has uamoi tara han te la uagou lia.” ²² Ba pal kapan turu Jiu e poeier, “Nonei e katsin kato hamatiena a peisanen? Taraha, nonei e pei lala, ‘Alimiou ema antunan la uami tara han te la uagou lia.’ ” ²³ Be Iesu e poeiena i taren, “Alimiou u butu mia tara han i puta teka, kaba alia u lama iasa. Alimiou u katunura i puta, kaba alia ema

katuun uagi i puta. ²⁴ Nonei te pei be gulei lia, alimiou e mate gono memou a man markato a man omi i tamilimiou. Na e manana, alimiou e mate hamana gono memou a man markato a man omi i tamilimiou, antunana tego hamana uamia limiou i tar alia nonei a katuun te antunan luba negu a man markato a man omi i tamilimiou.”

²⁵ Ba nori e poeier i tanen, “Alö be si?” E Iesu e sökana koru tala mei a man harangata i taren ba nonei e poeiena, “Alia e ranga hakapa mera gulo limiou. ²⁶ Alia e kamegu a man raranga a man parpara i tamilimiou, na lia e tatei haröto has ragi limiou a mamanaka a omi te katoe milimiou. Kaba a mamanaka te hatei negu lia turu katunura i puta nonei a manka tu hengoe malia tara katuun te halei moulia, na nonei e ranga hamana.”

²⁷ Nori ima atei sile ii e Iesu e rangein e Tamannen e Sunahan. ²⁸ Be Iesu e poeiena, “Pöata te hakute moa limiou alia tara kuruse, Alia tu butun Katunuma, ba limiou te töan atei sile mou alia esi. Ba limiou te atei sil hase mou alia ema ranga peisa megi a nitsunono i tar. E möa. Alia e ranga negu a man raranga te hatutse mei lia e Tamar. ²⁹ Na e Tamar e ka gono has menou lia. Nonei ema laba nai lia, taraha alia e roron katoegu a mamanaka te ngile nen.” ³⁰ A katuun a parpara e hengoe a man raranga te katoe e Iesu ba nori e hamana ria i tanen.

U raranga u mana te pureseiena a katuun

³¹ Be Iesu e poeiena turu Jiu ti hamanaia i tanen, “Esi te kukute nitöa nanou u hihatuts i tar, nonei a katunun tsitsilo hamana i tar. ³² Ba limiou te töan atei sile mou a nimana, na nonei a nimana

teka te purese ranou limiou.” ³³ Ba nori e poeier i tanen, “Alam u tuhanama tere Abraham. Na lam ima kukui puku noia ta katuun. I me temar mouna uana u ranga i tamölö te poeiena, ‘Alim-iou e hapurese rariou?’” ³⁴ Be Iesu e poeiena i taren, “Ü mana koru alia e hatei ragou limiou, a katuun te kato homi nitöana e herenei a katuun te karabusuna. Nonei e karabus na tara markato a omi te kato nitöa nanen. ³⁵ A tsonun kukui puku ema ka menei ta makum hamatskö i tanen tara luma tara katuun te hakuie nen, e möa, kaba a pien tara katuun terena luma te hakuina te pala uana tara hun katuun i tanen. ³⁶ Alia a pien tere Tamar e Sunahan. Te hapurese ragoua lia alimiou, ba limiou te töan tapurese hamana nitöa mou. ³⁷ Alia e atei silegu alimiou u tuhanama tere Abraham. Kaba limiou e ngilin atung hamate noahase moulia, taraha u raranga i tar emoa ta makum i tanen i torimilimiou. ³⁸ Alia e hatei negu a man raranga te hatei hakape melia e Tamar. Kaba limiou e kukute miou a man raranga turu tamamilimiou.”

³⁹ Ba nori e poeier i tanen, “E Abraham e tamamulam, nonei e tubumulam.” Be Iesu e poeiena i taren, “Tu tuhana hamana ma limiou tere Abraham, ga limiou go kato haseiam a ka te katoi e Abraham. ⁴⁰ Alimiou e katsin atung hamatie moulia. E Abraham ema markato uai teka. Alia e hatei ragu lei limiou u ranga hamana tu hengoe malia tere Sunahan. ⁴¹ Alimiou e markato koru las uamiou te markato uar u tamamilimiou.” Ba nori e poeier i tanen, “Alam ema pikeilatu mi. Alam e ka mem a töa tamamulam, nonei e Sunahan.” ⁴² Be Iesu e poeiena i taren, “Sanena tego hata-

mana uamia limiou tere Sunahan, alimiou sane ngile moulia, taraha alia u la hamatsköma tere Sunahan. Alia uma la memei u ngil peisa i tar. E möa. Nonei te tula na moulia. ⁴³ E hana ba limiou tema atei silemi a ka te ranga negu lia? Taraha, alimiou ema ngilin hengo nami u raranga i tar. ⁴⁴ E tamamilimiou e Satan, alimiou e ngilin katoemiou a ka te ngile nen. Nonei a katunun a hihipuli noana i manasa, na ema tuol neia tara nimana, taraha e moa ta nimana i tanen. Na pöata te gamo nen, nonei e kukutiena a markato noahas i tanen, taraha nonei a gamogamo na nonei a mouna u mamana u gamo hoboto. ⁴⁵ Kaba te ranga hamana gia lia, alimiou ema hamane milia. ⁴⁶ E si i tamilimiou te antunan haröto nena ta markato ta omi i tar? Ga te ranga tala nagia lia u mana, ga limiou e hahamana sil na milia aha? ⁴⁷ A pien tere Sunahan e hengoena u raranga tere Sunahan. Alimiou ema hengo memi u raranga tere Sunahan, taraha alimiou ema pien uami tere Sunahan.”

E Iesu na e Abraham

⁴⁸ Ba u Jiu e poeier i tanen, “Alam ema gamo mi te pei mena milam alö a toun Samaria, na lö e kamem a liliahanei!” ⁴⁹ Be Iesu e palis ranen me poeiena, “Alia ema ka megı ta liliahanei. Alia e solo seiegu e Tamar e Sunahan, kaba limiou e pitapute moulia. ⁵⁰ Alia ema kato silegi tego hapan menai lia a peisar. E möa. Kaba e Sunahan te hapane noulia, na nonei has a tson onuna i tarara. ⁵¹ U mana koru alia e hatei ragou limiou, a katuun te kukutiena u hihatuts i tar ema antunan mate noi!” ⁵² Ba u Jiu e poeier i tanen, “Pua! Alam

e atei talam te haranga mena nei lö a liliahanei! E Abraham e mate hakapa, na u propet has tere Sunahan. Kaba lö e poe noa hasem, ‘A katuun te kukutiena u hihatuts i tar ema mate koru noi.’⁵³ Alö e si koru? Alö e pan bala nem e tubumulam e Abraham te mate hakapa, na u propet has?”

⁵⁴ Be Iesu e ranga palis uana i taren me poeiena, “Sanena tego hapana menai lia a peisar, a nipan i tar a ka pinopino. E Tamagulia nonei te hapane noulia, na nonei has te ngöe milimiou e Sunahan i tamilimiou. ⁵⁵ Alimiou ema atei silemi e Sunahan, kaba lia te atei sile gen. Sanena alia go pei, ‘Alia ema atei sile gien,’ ba lia te gamogamo here has ragi limiou. Kaba alia e atei silegu e Sunahan na lia e kukute hasegu u raranga i tanen. ⁵⁶ E tubumilimiou e Abraham e hamana sil korui tego la uama lia tara han i puta. E here nei nonei e tara hakapi a ka teka, ba nonei te sasaala koru menen.”

⁵⁷ Ba u Jiu e poeier tere Iesu, “E Abraham e solon mate hakapa, na lö ema sabe noemi u tolima u maloto u hiningal. Imei te markato uanen balö te poeiem alö u taraia tere Abraham?” ⁵⁸ Be Iesu e poeiena i taren, “U mana koru alia e hatei hamana koru ragou limiou, alia u ka mam be Abraham e töan poseier.” ⁵⁹ Pöata ti hengoeien u ranga teka ba nori e lueier a man hatu me katsin tieri ien e Iesu. Kaba e Iesu e hamousi a peisanen me lakasa ba nena a Luman Lotu Pan.

9

E Iesu na katuun a matakiau

¹ E Iesu e tataala me tareiena a töa katuun a matakiau, e tsinanen e posa noa meien u mata u

kiou. ² Ba u katunun tsitsilo i tanen e rangatar, “Tson Hihatuts, esi te kato homi ba matanen e kiouna? Nonei, tsi e tsinanen tsi e tamanen?” ³ Be Iesu e poeiena, “E möa. E möa ta markato ta omi tega kato hakiou a katuun teka. Nonei e matakiau silema tego halakasa menaien a toukui tere Sunahan ba u katuun te töan tareren. ⁴ Aragi kato nitöani a toukui tere Sunahan te lan noa uana a ka, nonei te hala na moulia. Te bong nama a bong, ba katuun tema antunan kui lel noi. ⁵ Pöata te ka noa gia lia i puta, alia u ualesala turu katuun i puta.” ⁶ E Iesu e ranga hakapa me kahus uana turu tsiktsiki, ba nonei e sohale nei u kinahus u tsiktsiki ba nonei e sahi nanen i matana a katuun a matakiau. ⁷ Be Iesu e poeiena i tanen, “La tala, ba lö tena galusem a matamölö tara kioun ramun i Siloam.*” Ba nonei ena galusena a matanen, ba pöata te kopis pouts men nonei e tara haniga pouts. ⁸ Ba u katuun ti atei sileien na u katuun ti ron tareien tara pöata te singo la naien ta monin hitaguhu e rangatar, “A katuun teka te roron gum bate singo lanena ta monin hitaguhu, tsime?” ⁹ Ba palai e poeier, “Aa, nonei a katuun.” Kaba palai i pei, “E möa. Ema nonei nei, kaba e here neien.” Ba nonei a katuun e poeiena, “E möa, galia talasi.” ¹⁰ Kaba nori i rangata sugesugeien me poeier, “Ime te markato uanen ba matamölö te niga poutsuna?” ¹¹ Ba nonei e poeiena, “A katuun te kato hanige lala a matar a solonen e Iesu nonei e sahi nelala u tsiktsiki i matar me poeiena i tar, ‘La uu i Siloam balö tena galusem a matamölö.’ Ba lia e la gula mena galusegu a matar, balia e töan

* **9:7:** A solo teka (Siloam) e poeiena “tula nela.”

tara haniga poutsugu.” ¹² Ba nori e poeier i tanen, “A katuun teka e kana ime?” Ba nonei e poeiena, “Iba, alia ema ateigi.”

U Parasi ima hanigei e Iesu na katuun a matakiou

¹³ Ba nori e lu menari a katuun a matanen ti kato hakalata poutsi turu Parasi. ¹⁴ U mirakol teka e butuia turu Lan u Göagono turu Jiu. ¹⁵ Ba u Parasi e rangata haser nonei a katuun me poeier, “A matamölä e mar kalata pouts uana ime?” Ba nonei e poeiena i taren, “E Iesu e hake lala u tsiktsiki i matar balia ena galuse gen me tara poutsugu.”

¹⁶ Ba u palair u Parasi e poeier, “A katuun teka ema la meia tere Sunahan, taraha nonei kato pekoena a lo turu Lan u Göagono.” Ba palai e poeier, “A katuun a omi ema antunan kato nanei u mar mirakol teka.” Nori i lu kata hamanasa tala. ¹⁷ Ba u Parasi e rangata poutser a katuun a matakiou me poeier, “E si nonei te kato hakalate lala a matamölä?” Ba katuun e poeiena, “Nonei a propet!”

¹⁸ Kaba u Jiu i hahamanen a katuun a matakiou na i hahamanana hasiin te kalata pouts uu a matanen. Ba nori e ngöer e tsinanen ne tamanen. ¹⁹ Ba nori e rangata raren me poeier, “A pien tson tamilimiou teka? Nonei i posa mei u mata u kiou? E hana ba matanen te kalata poutsuna?” ²⁰ Ba u muntahol e ranga palis raren me poeier, “A pien tson tamulam teka, alam e atei silem nonei i posa mei u mata u kiou. ²¹ Kaba alam ema atei silemi temar tara pouts uanen, na lam ema atei sil hasemi esi te kato hakalata poutse lala a matanen. Alimiou go rangata peise men. Nonei

e pan hakapa. Nonei e antunan ranga peisana.”
²² U muntahol i mar ranga uu teka taraha nori i matoutir u katuun pan turu Jiu. A pal kapan i hatangana hoboto hakapein tegi tsuga mei ta katuun i luman lotu tego pei menaien e Iesu nonei e Mesaia te hala nema e Sunahan. ²³ Nonei a ka ti pei bei u muntahol, “Alimiou go rangata peise men. Nonei e pan hakapa.”

²⁴ Nori i ngö hahuolema nonei a katuun te matakiou mam me poeier i tanen, “Alö go ranga hamana koruia i matana e Sunahan. Alam e atei silem nonei e Iesu teka a katuun a omi.” ²⁵ Ba nonei e poeiena i taren, “Alia ema atei silegi tega omi uu a katuun teka. Alia e atei sil lasegu tu matakiou mam uu lia, kaba i romana alia e tara pouts talagu.” ²⁶ Ba nori e poeier i tanen, “Aha te katoe lalen i tamöLö? Ime te markato ue-lalen na ime te markato hakalata pouts melaleien a matamöLö?” ²⁷ Ba nonei e ranga lenina me poeiena, “Alia e hatei hakapa ragulou limiou, kaba limiou ema hengo mulei. Alimiou e ngilin hengo sil lel namien aha? Alimiou toum e ngilin kukute hase men?” ²⁸ Ba nori e ranga homi naren me poeier, “Alö a katunun tsitsilo i tanen, kaba alam u katunun tsitsilo tere Mosis. ²⁹ Alam e atei silem e Sunahan e ranga gono mei e Mosis. Kaba a katuun teka, alam ema atei silemi ime te la men.” ³⁰ Ba nonei e asingoto koruna me poeiena, “Boka! Alimiou ema atei silemi a katuun te kato hakalati a matar na ime te la men? ³¹ Ara e atei silera e Sunahan ema antunan hengo nanei a katuun a omi. Nonei e hengoe nou a katuun te soloseie nen na te kukuteiena u ngil i tanen. ³² Te tania noua ma u tsiktsiki u katuun ina mala hengo nai

ta katuun tega kato hakalata poutsi a matana a katuun ti posa mei u mata u kiou. ³³ Sanena a katuun teka tema la meia tere Sunahan, nonei ema antunan kato hasenei tu mirakol.” ³⁴ Ba nori e ranga sisi naren me poeier, “Alö i poseia iahana a markato a omi koru! E möa koru tego hatuts merai lö alam!” Ba nori e kute halakasa ba narien a luman lotu.

A baku kuhil

³⁵ E Iesu e hengoein ti tsuga menaien ba nonei ena sabiena a katuun teka ba nonei e poeiena, “Alö e hamana has uam tara Pien tere Sunahan?” ³⁶ Ba nonei e poeiena, “O Tsunono, esi nonei a katuun teka? Hateie moulia balia te hamana has gia i tanen.” ³⁷ Be Iesu e poeiena i tanen, “Alö e tara hakape mulen. Nonei a katuun te ranga gono me noulö.” ³⁸ Ba katuun e poeiena, “O Tsunono, alia e hamanagu.” Ba nonei e hatukun na i matana e Iesu. ³⁹ Be Iesu e poeiena, “Alia u la silema i puta tegomi lu kata merai lia u katuun te hamanar na u katuun te hahamanar. U katuun te hamanar e markato uar tara katuun a matakiau te kato hakalata poutse gula lia. Na u katuun te hahamanar e kato uar tara katuun a mata kalata kaba ema tare nei ta töa taka.” ⁴⁰ U Parasi ti ka hasukusukuia te kaien i hengo temar ranga uaien me poeier i tanen, “Alam be matakium?” ⁴¹ Be Iesu e poeiena i taren, “Sanena limiou go matakiau iam ba limiou tema tatei kamemi ta markato ta omi. Kaba te pei tale mialimiu, ‘alam e taram,’ a markato a omi i tamilimiu ema tatei tia noi.”

10

A tsonun taratara kap a niga turu sipsip

¹ Be Iesu e poeiena, “U mana koku alia e hatei hamana ragou limiou, a katuun te raman tasuna tara tamana tara ololon sipsip bate aroho tuun na tara tana makum, nonei a katuun a kopkop. ² Kaba a katunun pepeito kap turu sipsip e roron tasu silana tara tamana. ³ Na katunun pepeito kap tara tamana e kalata nanei a katuun teka a tamana. U sipsip hoboto e atei siler temar ling uana a runguna a katunun pepeito kap i taren, na nonei e atei sil hoboto rena a man sipsip i tanen ne ngö has raneien a man tötöa a man solo i taren ba nori te kukutie ren bate lakasar. ⁴ Pöata te halakasa hakapa hoboto relalen a man sipsip i tanen ba nonei te mammam ranen ba u sipsip i tanen te kukute ren taraha nori e atei siler a mar ling tara rungunen. ⁵ U sipsip i tanen ema tatei kukutieri a tana katuun, nori e bus ba naroiën, taraha nori ema hengo mareieri u mar ranga tara tana katuun.” ⁶ E Iesu e kato u haharuei teka turu katuun, kaba nori ima atei sile ii aha te ranga naiën.

E Iesu e here nei a katunun pepeito kap a niga turu sipsip

⁷ Be Iesu e pei lelëna i taren, “U mana koku alia e hatei hamana koku ragou limiou, u katuun e hererari u sipsip na lia e heregi a tamana tara ololon sipsip. ⁸ U katuun* ti mam na moulia, nori u kopkop na u gamogamo kaba u sipsip ima hengo raiën. ⁹ Alia a tamana turu sipsip. A katuun te sila noua tara tamana teka ena niga nou, taraha alia e tara kap nagouën. Nonei e tatei tasu nama

* **10:8:** U propet u gamogamo.

romana bate lakasa poutsuna batena hōata lana. ¹⁰ A kopkop e la sil tuun lase nama tegomi kop uu bate atung hamate rena u sipsip. Alia u la silema tegimi lu menai u katuun a nitōatōa, a nitōatōa a niga nitōa.

¹¹ “Alia e heregi a katunun pepeito kap a niga turu sipsip te tatei mate sil rena u sipsip i tanen.

¹² A katunun kui tuun e bus ba rena u sipsip tara pōata te la nama a muki a hie, taraha nonei ema tue ranei u sipsip na nonei ema katunun pepeito kap hamana has uanei turu sipsip. Ba muki a hie tena kotokoto rena u sipsip bate rura ranen.

¹³ Nonei e busmena, taraha nonei a katunun kui tuun batema hakats sil tala ranei u sipsip. Na e markato has uana turu katuun u gamogamo tema pepeito kap haniga rari u katuun i tar.

¹⁴⁻¹⁵ “Alia e heregi a katunun pepeito kap a niga turu sipsip te atei sil rena u sipsip i tanen na u sipsip i tanen e atei sil hase ren. Alia e atei sil regu u katuun te hamana uar i tar ba nori te atei sil hase riou lia. Na e markato has uana iesana tere Tamar. Nonei e atei sile noulia na lia e atei sil hase gen. Na lia e mate sil ragou u katuun i tar. ¹⁶ A palair u katuun has i tar e ka ria ielesala tara ololon sipsip i tar. Alia ena peigi has ragumen romana ba nori te hengoe riou u raranga i tar. Bate ka menou a tōa puku a heis sipsip na tōa puku a katunun pepeito kap i taren. ¹⁷ E Tamar e ngil korue noulia, taraha alia e haniga negu tego mate uu lia ba lia te tōatōa pouts gou. ¹⁸ E möa ta katuun ga antunan atung hamate naiou lia turu ngil i tanen. Alia peisa te hala nagou a peisar tara tou mate. Alia e ka megu a nitagala tego haniga uu lia ba u katuun te atung

hamatie riou lia, na lia e ka has megu a nitagala tego tōatōa pouts uu lia. Nonei a ka te ranga mei lia e Tamar tego katoi lia.”

¹⁹ U Jiu i hengoein u raranga teka ba nori e lu kate ria a peisaren a huol a pala. ²⁰ U katuun u parpara i pei, “U liliahanei e ka mer a katuun teka na nonei e momolōna. Aha te hengo sile mien limiou?” ²¹ Kaba palai i pei, “E möa. A katuun te ka mena a liliahanei ema tatei ranga uanei teka. A liliahanei e antunan kato hakalata hasena a matakiau? E möa!”

U Jiu i tori tsugani e Iesu

²²⁻²³ Tara pōata teka a kannou pan tara Luman Lotu Pan† egi kato poneia i Jerusalem. A pōatan hamuri poni be Iesu e tataala lana i rehina Luman Lotu Pan turu kake ti ngōei u kaken oho tere Solomon. ²⁴ Ba u Jiu e gono hahise ren me poeier i tanen, “Alam e mate las memou te hahaloso uamou lam. Hatei hamatskō ramou lam, alō e Me-saia te hala nema e Sunahan tsi e möa?” ²⁵ Be Iesu e poeiena i taren, “Alia u hatei raiou limiou, kaba alimiou ema hamane milia. A man mirakol na man hiharōto te katoe gulia tara solo tere Tamar te hatei nena te mana uana u raranga i tar. ²⁶ Kaba alimiou ema hamane milia, taraha a limiou ema sipsip uami i tar. ²⁷ U katuun i tar e hengo mareier a mar ranga i tar. Alia e atei sil ragen, na nori e kukute hase riou lia. ²⁸ Alia e hala ragouen a nitōatōa te ka nitōana ba nori tema tatei tia roi romana. E möa ta tōa ta katuun tega antunan gul ba rai lia u katuun i tar. ²⁹ E Tamar e hala

† **10:22-23:** A kannou pan teka i kato meia u mamana u hiningal tara pōata ti kalata meia a Luman Lotu Pan i Jerusalem.

rai lia u katuun teka na nonei e pan bala nena a mamanaka hoboton töa ne möa ta katuun ga antunan lu baraien i limana e Tamar. ³⁰ E Tamar na lia a töa puku a katuun.”

³¹ Ba u Jiu e lu poneier a man hatu tegi ti menaien e Iesu. ³² Kaba e Iesu e pei i taren, “Alia u haröto rai limiou a mamana toukui a niga tere Tamar. Ga saha mar toukui te katsin titi hatu memi limiou alia?” ³³ Ba u Jiu e palise ren me poeier, “Alam ema ti hatu memoi lö tu kato mei lö a toukui a niga. E möa. Alam e raharaha mem te ranga homi mena milö e Sunahan. Taraha, alö a katuun tuun, kaba alö e kato here nami a peisamolö e Sunahan.” ³⁴ Be Iesu e palis ranen me poeiena, “I koloto hakapa naia turu Buku u Göagono i tamilimiou te pei mei e Sunahan, ‘Alimiou e heremi u sunahan.’ ³⁵ Na u ranga turu Buku u Göagono ema antunan kapa nei. Na e Sunahan e pei nori u katuun ti halarai u raranga tere Sunahan i herei u sunahan. ³⁶ Alimiou e antunan ranga hasimiou bate peimiou, a katuun te kato hagöagoni e Tamar me tula mena meien i puta e ranga homi nena e Sunahan te pei mena neien, ‘Alia a Pien tere Sunahan.’ Ge hana ba limiou te mar ranga uamiau teka? ³⁷ Tema katoe gi lia a man toukui tere Tamar, möa tala tu hamane moulia. ³⁸ Kaba te katoegien lia, noahasina tema hamane milimiou alia, hamana mia tara toukui i tar ba limiou te atei sile mou e Tamar e kana i tar na lia e ka has gia i tanen.” ³⁹ Ba nori e katsin pile kap lel pon naren, kaba nori ma pile sabe naien. ⁴⁰ Ba nonei e la pouts uana i hapalana a Ramun i Jodan mena kana tara han te baptais mam ia e Jon. ⁴¹ A katuun a para i lauama i tanen

me hiararangar me poeier, “E Jon ema haröto nai tu mirakol, kaba a mamanaka te hatei naien tere Iesu e manana.” ⁴² Ba u katuun u parpara teka e hamana uar tere Iesu.

11

A nimate tere Lasarus

¹ A töa katuun a solonen e Lasarus e siki. Nonei e kaia tara taun i Betani ti ka has ia u hahinanen ere Marta mere Maria. ² E Maria nonei a tahol te tsu nama u uapi u soksoka i mouna e Iesu me sahe nei a hulunen a man mounen. E Lasarus e siki koru. ³ Ba u mun toulana e hala nelila u raranga tere Iesu me poeier, “O Tsunono, a katuun te ngil korue mölö e ka mena a siki pan koru.” ⁴ Kaba pöata te hengoeia e Iesu u ranga teka, ba nonei e poeiena, “A siki teka ema kato hamate nitöa nanoi e Lasarus. E Lasarus e siki silena tego solo sei menaien a solona e Sunahan ba Pien tere Sunahan te tatei solo sei sila has naroa i tanen.” ⁵ E Iesu e ngil koru e Marta mere toulanen ne Lasarus has. ⁶ Kaba pöata te hengo naien e Lasarus e ka mei a siki, ba nonei e ka lelana u huol u lan tara han te kaien. ⁷ Ba i murinen ba nonei e töan poeiena turu katunun tsitsilo i tanen, “Aragi la pouts i Judia.” ⁸ Ba u katunun tsitsilo i tanen e poeier, “Tson Hihatuts, ema lehana nei ti katsin titi hate malö u Jiu, ba lö te ngilin la pouts lel uam nonei tara han teka?” ⁹ Be Iesu e poeiena, “A lan e ka mena u ualesala te taniana tara bongbong batena antunana tara lahi. U katuun te tataala mer a lan ema antunan tutu ranoui, taraha nori e tareier u alesalana tara han. ¹⁰ Kaba u katuun te hula la

mer a bong e tutu ranou, taraha u alesala ema ka gono mera neien.”

¹¹ Be Iesu e ranga lenina me poeiena, “A hahikapien i tarara e Lasarus e sohona, kaba alia ena gule poutse goen.” ¹² Ba u katunun tsitsilo e poeier, “O Tsunono, te soho nen nonei e niga pouts nou.” ¹³ E Iesu e haharuein a tou mate i tanen, kaba u katunun tsitsilo i tanen i pei e Lasarus e soho tuun. ¹⁴ Be Iesu e hatei haniga pouts ranen, “e Lasarus e mate.” ¹⁵ Ba nonei e poeiena, “E niga koruna tuma ka uai lia te mateien ba limiou tena tare mou a ka tena katoe goulia, ba limiou te tōan hamana mou. La tala mou i tanen.” ¹⁶ Be Tomas ti ngö hasei e Didimus e poeiena tara palair u katunun tsitsilo, “La mou aragi la, bara tena mate gono merouen.”

E Iesu e hatakei pouts rena u katuun me hala raneien a nitōatōa

¹⁷ E Iesu emi hengo naia te ka hakapa mei e Lasarus u tohats u lan iahana kiou tara pōata te tukuien i rehina taun i Betani. ¹⁸ Betani e sulusukuna i Jerusalem, e antunana tara topisa puku a kilomita. ¹⁹ A para a katuun turu Jiu i lama memi ka gono mer ere Marta mere Maria te mate uu e hahinaren e Lasarus. ²⁰ Pōata te hengo naia e Marta te lauama e Iesu, ba nonei ena tare nen, kaba e Maria e kaka ma i han. ²¹ Be Marta e poeiena tere Iesu, “O Tsunono, sanena lö tu kaia teka, e hahinar sanena ema antunan mate ii! ²² Kaba eni noahas alia e atei silegu e Sunahan e tatei hale noi lö a ka te rangata sile mölö i tanen.” ²³ Be Iesu e poeiena i tanen, “E hahinamölö e takei pouts nou.” ²⁴ Be Marta e

poeiena i tanen, “Alia e atei silegu nonei e takei pouts noa romana tara tou mate i tanen tara kapakapana pöata, tara pöata te hatakei pouts rena romana e Sunahan u mate hoboto.” ²⁵ Be Iesu e poeiena i tanen, “Alia nonei a nitakei pouts turu katuun na nitöatöa. Esi te hamana uana i tar, noahasina te mate uaren romana, kaba nori ena töatöa pouts has riou romana. ²⁶ Na u katuun te töatöar bate hamana uar i tar, ema antunan mate roi romana. Alö e hamanem u ranga teka?” ²⁷ Be Marta e poeiena i tanen, “Aa, o Tsunono. Alia e hamanegou lö e Mesaia, a Pien tere Sunahan, a katuun tega lauama i puta.”

E Iesu e tabena

²⁸ E Marta e mar ranga hakapa uu teka ba nonei e la poutsuna mena ngöena e toulanen e Maria me hahasi menen me poeiena, “A Tson Hihatuts e kana, nonei e ngöe noulö.” ²⁹ Pöata te hengoeia e Maria u ranga teka ba nonei e hasesei sil tunena tegona tara menaien e Iesu. ³⁰ E Iesu ema butu noaia tara han tere Maria kaba nonei e ka noaia tara makum tena tareien e Marta. ³¹ U Jiu ti ka gono mei e Maria te taatagi ien kaba nori i tari te lakasa hasesei uu e Maria ba nori e kukutien, taraha nori i pei nonei e lau tara kioun mate tegona tabe uaien. ³² Pöata te tukuia e Maria te kaia e Iesu me tare nen ba nonei e hatukun na i matanen me poeiena, “O Tsunono, sanena lö tu kaia teka, e hahinar sanena ema antunan mate ii!” ³³ Pöata te tareia e Iesu te tabe uu e Maria na ti tabe has uu Jiu ti la gono has memen, ba nonei e sagohena a nitaatagi pan koru i torinen. ³⁴ Be Iesu e poeiena, “Ime ti hongeien?” Ba nori e

poeier i tanen, “O Tsunono, lama. Mi tara.” ³⁵ Be Iesu e tabe hasina. ³⁶ Ba u Jiu e poeier, “Taraiam, nonei e ngil korui e Lasarus.” ³⁷ Kaba palai i pei, “E hana ba katuun te kato hakalata poutsi a matakiau tema antunana hapiou nanei a tou mate tara katuun teka?”

E Iesu e hatakei poutsi e Lasarus tara tou mate i tanen

³⁸ E Iesu e sagoho leli a nitaatagi pan i torinen ba nonei e la uana tara kiou. A kioun mate teka i kuieia turu lapo na a hatu pan i halakopo kap nai a matana kiou. ³⁹ Be Iesu e poeiena, “Luba naiam a hatu!” Be Marta e hahinana a katuun te mate e poeiena i tanen, “O Tsunono, nonei e soka hamanasa talana, taraha u tohats u lan e la hakapa te ka nen tara kiou.” ⁴⁰ Be Iesu e poeiena i tanen, “Alia e hatei hakape gölo lö, te hamana mia lö i tar, balö te tare mou a nitagala pan tere Sunahan.” ⁴¹ Ba nori e luba ner a hatu. Be Iesu e tara seinä me poeiena, “O Tamar, alia e haniga uagu i tamölö te hengo mena milö alia. ⁴² Na lia e atei silegu alö e roron hengoe moulia, kaba lia e mar ranga uagu teka i matar u katuun te ka ria teka, ba nori te tatei hamaner tu hala mena mei lö alia.” ⁴³ Pöata te ranga hakapa uen teka ba nonei e ku hapanina me poeiena, “O Lasarus, lakasama!” ⁴⁴ Ba katuun a mate e lakasa nama tara kiou. A limanen na mounen i pilei u labalaba ti kiis kaakati na bakunen i pitsei u labalaba. Be Iesu e poeiena i taren, “Purese iam, ba nonei te lana!”

*A pal kapan i korupaköni e Iesu
(Matu 26:1-5, Mak 14:1-2, Luk 22:1-2)*

⁴⁵ U katuun u parpara turu Jiu ti la gono mema e Maria i tari a ka te kati e Iesu, ba nori e hamana soköu ria i tanen. ⁴⁶ Kaba palair u Jiu teka i la uu turu Parasi mena hatei rarien a ka te kati e Iesu. ⁴⁷ Ba u Pris pan na u Parasi e ngö gögono rer a pal kapan turu Kout Pan turu Jiu ba nori e poeier, “Aha te katoe rou ra? A katuun teka e katoena a man hiharöto a man para! ⁴⁸ Tema hapiou naroien ra, ba u katuun hoboto te hamana uariou i tanen. Ba u ami ri Rom temi kato homie riou a Luman Lotu Pan i tarara na u han hoboto i tarara!” ⁴⁹ Kaba a töa i taren, e Kaiapas a tsunono pan turu pris nonei turu hiningal teka e poeiena i taren, “Alimiou ema atei silemi ta ka! ⁵⁰ Alimiou ema lu halesale mi a ka teka, e niga bala nena tego mate sil mei ta töa ta katuun u katuun hoboto. Alimiou goma hatangana nami a han hoboto i tarara gi kato tie.” ⁵¹ Kaba u ranga teka ema lameia i tanen. E möa. Nonei a tsunono pan turu pris, kaba ema atei silei nonei e hatei mamin tegona mate sil menai e Iesu u Jiu. ⁵² Kaba e Iesu ema mate sil peisa ranoui u Jiu, nonei e mate sil hase nou tego gono meraien a galapien tere Sunahan te ka kalakala ria tara mamana han ba nori te katoe riou a töa hun katuun. ⁵³ Turu lan has teka ba pal kapan e tanian korupakö ner e Iesu.

⁵⁴ I markato tala uu teka, be Iesu ema hula la lel neia i matar u Jiu i Judia. Kaba nonei e la uu tara töa han i rehina a makum a palaka, ba nonei ena ka gono meraiena u katunun tsitsilo i tanen tara taun ti ngöei Ipraim. ⁵⁵ A kannouna turu Paska turu Jiu e sukusuku hakapa, ba u katuun u parpara turu han i lehana e la uaruma i Jerusalem. Taraha, nori i ngilin hagogosi a

peisaren tara Lo turu Jiu i mamima a kannouna turu Paska. ⁵⁶ U katuun i sake lan e Iesu ti tuol ien tara Luman Lotu Pan me poeier, “Alimiou e pei miou aha? E Iesu ena la has nama romana tara kannou?” ⁵⁷ U Pris pan na u Parasi i hatataali u raranga u tagala koru te poei, “A katuun te atei silena te kana e Iesu ega hatei railam ba lam tena lue men.”

12

E Maria e tsu naia u uapi i mouna e Iesu (Matiu 26:6-13, Mak 14:3-9)

¹ U tönomo u lan i mam tara kannouna turu Paska e Iesu e lauama i Betani tara han te kaia e Lasarus, a katuun te hatakei poutseien tara tou mate i tanen. ² Ba u katuun e kato berien a kannou. E Marta e hitaguhu ia te sösöata menaien a kannou be Lasarus na palair u katuun i gum gono meia e Iesu turu tebol. ³ Ba e Maria e luena a botolo uapi a soka hanigantöa a hihol i tanen te la sei koruna, ti kuiei u ka te ngöri u nat. Ba nonei e kis nanen i mouna e Iesu me sahe nei a mounen a hulunen. A luma e saputi a soka masina turu uapi. ⁴⁻⁵ Kaba e Judas Iskariot, a töa has a katunun tsitsilo tere Iesu na nonei has tena haröto nanou e Iesu turu pakö i tanen, e poeiena, “U uapi teka e antunana tara 300 denarius. E gi mala haholin bate lue ri ta moni egi hala rai u katuun ti möa ta moni.” ⁶ E Judas e ma taatagiri u katuun ti möa ta moni. Nonei e mar ranga uu teka, taraha nonei a kopkop. Nonei a katuun te taratara kapiin a moni turu katunun tsitsilo tere Iesu, na nonei e roron kop ia i tanen. ⁷ Be Iesu e poeiena, “Hakei! Nonei e hol sile meien egomi haputu sileien u lan tegina

hongo menai lia tara kiou. ⁸ U katuun ti möa ta moni e ka gono nitöa mera riou limiou. Kaba alia ema ka gono nitöa mera goi limiou.”

A pal kapan turu Jiu i korupaköni e Lasarus

⁹ Pöata ti atei silei u Jiu e Iesu e kaia i Betani ba nori e la ruma. Nori ima la sil peise mei e Iesu, kaba nori emi katsin tara hasi e Lasarus, a katuun ti hatakei poutseia e Iesu tara tou mate i tanen. ¹⁰⁻¹¹ Ba u Pris pan e koru pakö has ner tegi atung hamate menaien e Lasarus, taraha, tara nitöatöa i tanen ba para koru turu Jiu te la halhal ba raren bate hamana uar tere Iesu.

*E Iesu e tasu herei a king tara han i Jerusalem
(Matiu 21:1-11, Mak 11:1-11, Luk 19:28-40)*

¹² Turu tanu lan a katuun e gono te la uama tara kannouna turu Paska turu Jiu nori i hengoein te la uama e Iesu i Jerusalem. ¹³ Ba nori e luer a man kalan kikia me lar tegina tupala menaien e Iesu me ku hapan lala lila me poeier,
“Hosana! (Soloseiam a Tsunono)
E Sunahan e kalalena a katuun te la menama a nitsunono i tanen!
Soloseiam a Kingina i Israel!”

¹⁴⁻¹⁵ Be Iesu e luena a töa tunan rongki me osana i tanen. Nonei e markato uu te ranga uana u Buku u Göagono e poeiena:

“Alimiou u katunura i Saion e möa tu matout iam.
Tara, a King i tamilimiou e la hamanasa nama nonei e osana tara tunan rongki.”

¹⁶ U katunun tsitsilo ima atei silei a ka teka nonei tara pöata. Kaba i murina te takei pouts ia e Iesu, ba nori te töan hakats pouts ner a manka teka i koloto beien turu Buku u Göagono, na man

ranga i tanen e butu hamana. ¹⁷⁻¹⁸ U katuun u para tika tara pöata te ku hatakei poutseien e Lasarus tara kioun mate me kato hatöatöa poutse nen i habulungana nohasin u mirakol teka. U katuun ina ngilin tara has mei e Iesu, Taraha, nori i hengoein nonei e kati a ka teka. ¹⁹ Ba u Parasi e hiararangar me poeier, “Ara ema antunan kato nari taka. Taraiam, u katuun hoboto e kukutie ren!”

A palair u Grik i ngilin tari e Iesu

²⁰ E ka has mei a palair u katunura i Grik i gusura u katuun ti la uu tara kannouna turu Paska tina hatsunono menaien e Sunahan. ²¹ Ba nori e la uar tere Pilip, a toun Betsaida i Galili, ba nori e poeier i tanen, “A tsi tsunono, alam e ngilin tara nem e Iesu.” ²² Be Pilip ena hateiena e Endru. Bere Endru mere Pilip ena hateier e Iesu. ²³ Be Iesu e poeiena i taren, “A pöata e butu hakapa te kato hapan poutse noa e Sunahan alia, Alia tu butun Katunuma. ²⁴ Alia e hatei hamana koru ragou limiou. Tema lebe ria a ngalin kannou, nonei e marka tuun las uanou teka. Kaba tena lebe roien ba nonei tena hua haparpara nou romana. ²⁵ U katuun te ngil korueier a nitöatöa taren na i puta ena mate riou. Kaba u katuun tema ngileri a nitöatöa na i puta ena lueriou a nitöatöa te ka nitöana. ²⁶ A katuun te ngilin kato nena a toukui i tar ega kukutie iou lia. Na katuun te katoena a toukui i tar ena ka noua tena ka has goua lia, e Tamar te kato hapane nouen.”

E Iesu e hatein a nimate i tanen

27 Be Iesu e pei lelana, “A torir e tiama koru talana. Kaba alia go pei aha, ‘O Tamar, alö go luban a pöata a omi te butu nama i tar?’ E möa. Taraha, nonei a ka tu la silema lia. 28 O Tamar, alö go hapani a peisa mölö.” Ba u töa u ranga e ling nama i Kolö me poeiena, “Alia u kato hapan hakapi a peisar na lia e kato lel hase gouen.” 29 Ba u katuun ti ka hasukusuku e hengoeir a ka teka me poeier, u gururu! Ba palai e poeier, “A töa angelo te ranga gono mela len!” 30 Be Iesu e poeiena i taren, “U raranga te butu lala e la sil rena moulimiou, ema la sile namei lia. 31 A pöata turu kout tere Sunahan e butu hakapa. Nonei e katsin tsuga ba tala nena e Satan. 32 A pöata te haka seie rouen lia tara kuruse, alia e las meragumei romana u katuun hoboto i tar.” 33 E Iesu e mar ranga uu teka taraha e hateini tega mar mate uaien romana. 34 Ba u katuun e poeier i tanen, “U Buku u Göagono e poeiena, e Mesaia te hopö kapiin e Sunahan tega butun katuun uen, e töatöa nitöana romana. E hana balö te poeiem, ‘E si te butun katunuma egi na hakuteia tara kuruse?’ E si nonei te butun katunuma?” 35 Be Iesu e poeiena i taren, “Ualesala e gamon ka halehana gono mera noulimiou. Tataala iam te ka noa uana ualesala. U kuhil ena mots la karasa ba ranou limiou. Te tataala mia lö turu kuhil, alö ma atei sile mi te sila mia lö. 36 Pöata te ka memia lö u hamana turu ualesala balö te ka here moua a pien turu ualesala.”

U Jiu i hahamana

E Iesu e mar ranga hakapa uu teka ba nonei ena mous ba ranen. 37 Nonei e mastein katoi

u mirakol u parpara i mataren, kaba nori i hamana noahas naien. ³⁸ A manka teka e butu sili tego hakapa menaien u raranga tere Aisaia, a propetina i manasa e mar ranga uu teka:

“O Tsunono, u katuun ema hamaneri u raranga i tamulam.

E Sunahan e harötein a nitagala i tanen tara man töa man katuun.”

³⁹ Kaba nori ima hamana tala mei, taraha e Aisaia e pei hasi,

⁴⁰ “E Sunahan e kato hakuhilenou u hakhakats i taren temar kuhil uana a katuun a matakiau.

Nonei e kato hatupu hasi a bakuren.

Ba mataren tema antunan tara lele nei a ka te manana,

na u hakats i taren ema antunan atei sil lel hase nei u raranga u mana.

Na nori ema antunan habirits pouts lel uari i tar ba lia te kato haniga pouts ragen. E möa.”

⁴¹ E Aisaia e mar ranga uu teka, taraha nonei e tara mami tega pan uu e Kristo me hatei nanen.

⁴² Kaba a para a katuun pan turu Jiu i hamana noa hasia tere Iesu. Kaba nori ima ranga naien i matar u katuun, taraha nori i matoutir u Parasi ena mots tsuga ba rarien a luman lotu. ⁴³ Taraha! Nori i ngil koru tegi haniga meraien u katuun. Nori ima ngil korui tego haniga meraien e Sunahan.

Uranga tere Iesu e kout rena romana u katuun

⁴⁴ Be Iesu e ranga hapanina me poeiena, “A katuun te hamana uana i tar e hamana has uana tere Sunahan te hala na moulia. ⁴⁵ Na katuun te tare noulia e here nei e tara hasena e Sunahan te hala na moulia. ⁴⁶ Alia u la here mei ualesala i puta

ba u katuun te hamana uar i tar tema ka nitöa roi turu kuhil. ⁴⁷ Te hengo papalena a katuun u ranga i tar batema kukutie neien, alia ema tatei one gien. Taraha, alia u la silema tegomi lu pouts merai u katuun i puta. Alia uma la sile mei tegomi ona meraien lia. E möa. ⁴⁸ A katuun te tori tsuga nanou lia na te rama nena u raranga i tar, nonei ena butu noa has noua tara tsonun ona turu raranga tara kapakapana pöata. Na u raranga te katoe gulia nonei tena ona pouts hase nouen. ⁴⁹ Alia ema ranga nagi u raranga peisa i tar. E möa. E Tamar te hale moulia te hatei nelia a ka tego rangein lia. ⁵⁰ Na lia e atei silegu u raranga i tanen te hala nena a nitöatöa te ka nitöana. Na mamanaka hoboto te ranga negu lia e Sunahan e hateien lia.”

13

E Iesu e galus a mour u katunun tsitsilo i tanen

¹ A pöata tara kannouna turu Paska turu Jiu e butu hakapa tala, be Iesu e atei silena a pöata e sulusuku koru hamanasa tego laba menaien a han i puta teka bate la pouts uana tere Tamanen. Nonei e ngil korur u katuun i tanen i puta teka e antunaia te mateien. ² A ka e lahi hakapa ba nori e nour, kaba e Satan e haka hakapeia u hakhakats tere Judas Iskariot a pien tere Saimon tego haröto menaien e Iesu turu katuun ti paköe ien. ³ Na e Iesu e atei sil e Tamanen e kato hapaneien tara mamanaka hoboto, na nonei e atei sil hasi nonei e lama tere Sunahan na nonei ega la pouts has uu tere Sunahan. ⁴ Ba nonei e takeina be luba nena u hasobö u ngahangaha i tanen me hapouseiena u tol. ⁵ Ba nonei e hakis nena u ramun tara diis me

tanian galusena a man mour u katunun tsitsilo i tanen me sahi hapalaka raneien u tol te pouseien.

⁶ Pöata temi butuia e Iesu tere Saimon Pita, be Pita e poeiena i tanen, “O Tsunono, alö ema antunan galusemi a man mour!” ⁷ Be Iesu e poeiena i tanen, “Alö ema atei silemi a ka te kate gulia teka, kaba lö na atei moto mou.” ⁸ Be Pita e poeiena, “E möa koru tego galus menai lö a man mour!” Be Iesu e poeiena, “Tema galuse goi lia a moumölö, alö ema toun katuun uamoi i tar.” ⁹ Be Saimon Pita e poeiena i tanen, “O Tsunono, te markato uanen teka, ba lö te galusem a man mour na man limar na bakur na peisar hoboto!” ¹⁰ Be Iesu e poeiena i tanen, “A katuun te totobu hakapa lala, a peisanen e gogoso hobotona. A torimilimiou e gogosona, kaba töa puku tema gogoso nei.” ¹¹ E Iesu e atei sil esi tena haröto nanouen turu pakö i tanen. Nonei te pei beien, “A töa i tamilimiou tema gogoso nei.”

¹² E Iesu e galus hakapi a man mouren me hasei poutsena u hasobö u ngahangaha i tanen mena gum poutsuna. Ba nonei e poeiena i taren, “Alimiou e atei sil hasemiou a ka te katoe gula lia i tamilimiou?” ¹³ Alimiou e ngöe milia a Tson Hihatuts, na limiou e ngö hase milia a Tsunono. Alimiou e ranga hamatskömiou, taraha alia a Tsunono i tamilimiou na Tson Hihatuts has i tamilimiou. ¹⁴ Te galuse gula lia a man moumilimiou—alia a Tson Hihatuts na Tsunono has i tamilimiou—bara, alimiou ena galus hasemou a man mour a palai. ¹⁵ Taraha! Alia e kato megu lei a ka teka tegona markato has uamou limiou iesana. ¹⁶ U mana koru alia e ranga hamana mera goulimiou, a katunun kui ema pan nanei a katuun pan i

tanen. Na tson hibus ema pan has nanei a katuun te hale neien u ranga. ¹⁷ Te atei silemia limiou a ka teka, alimiou e kalala rariou tego kukute nenamen limiou.

¹⁸ “U raranga teka ema la uanei i tamilimiou hoboto. E möa. Alia e atei silegu u katuun tu hopö kapir lia. Na u ranga turu Buku u Göagono e butu hamana nou te poeiena, ‘A katuun te nou gono meiou lia ena haröto nanoua lia turu katuun te paköe riou lia.’ ¹⁹ Alia e hatei mam ragi limiou a ka teka, ba pöata te butu hamana nouen ba limiou te hamane mou nonei alia e Kristo. ²⁰ U mana koru alia e ranga hamana mera goulimiou, esi te toulena a katuun te tula negulia e toul hase noulia. Na pöata te lue mia limiou alia, alimiou e lu hasemiu e Tamar te hale moulia.”

E Iesu e hatei mamin esi tena haröto nanouen turu katuun ti paköeien

(Matiu 26:20-25, Mak 14:17-21, Luk 22:21-23)

²¹ E Iesu e ranga hakapa las uu teka ba peisamen te tiana koru hamanasana, ba nonei e ranga hapanina me poeiena, “U mana koru alia e ranga hamana mera goulimiou, a töa i tamilimiou ena haröto nanoua lia turu katuun te paköe riou lia.”

²² Ba u katunun tsitsilo i tanen e hiataratarar. Nori ima atei silei esi te ranga naien. ²³ A aposol te ngil korui e Iesu e gum ia i rehina e Iesu turu tebol.

²⁴ Be Saimon Pita e tara uana nonei tara aposol teka me poeiena, “Alö go rangateien, esi nonei te ranga nanen.” ²⁵ Ba nonei a aposol e habere uana tere Iesu me poeiena, “O Tsunono, esi nonei?”

²⁶ Be Iesu e poeiena, “Alia e habue go a tsi taposen beret bate hale goien a katuun teka.” Ba nonei e

habuena a tsi taposen beret me hale neien e Judas, a pien tere Saimon Iskariot. ²⁷ Pöata te lu hakapeia e Judas a tsi makumun beret, be Satan e seina i tanen. Be Iesu e poeiena i tanen, “Kato borobori a ka te katsin katoe mölö.” ²⁸ E möa ta töa turu tebol ti gum hahiseien ega atei sili aha te kato silei e Iesu u raranga teka tere Judas. ²⁹ E Judas e roron pepeito kapiin a man moni turu katunun tsitsilo, ba palai e poeier e Iesu e ranga mei e Judas tegona hol menaien a man kana tara kannou, ba palai te poeier nonei e gana hala toumin ta tsi moni turu katuun ti möa ta moni. ³⁰ E Judas e lu hakapa lasi a tsi makumun beret teka ba nonei te lakasana. A ka e bong hakapa.

U pan nen u raranga u tsimus

³¹ Pöata te lakasa hakapaia e Judas be Iesu e poeiena, “Alia tu butun Katunuma e solo sei tale riou. Ba lia te söata sei hasegou a solona e Sunahan. ³² Te hala seie goua lia a solona e Sunahan be Sunahan te hala sei boroboro hase nou a solor. ³³ A matsi galapien, alia e ka gono mera goulimiou tara tsitabubun pöata patu, ba lia te töan laba ragou limiou. Alimiou e sokie moulia, kaba lia u mar ranga uu tara pal kapan turu Jiu teka, temar ranga has uagu lia i tamilimiou, “Te la uagu lia alimiou ema antunan la mumei.” ³⁴ Alia e hala ragi limiou u raranga u tsimus, alimiou go hiangilngil iam. Ti mar ngil has merai lia limiou. ³⁵ Te hiangilngil moua limiou, ba u katuun hoboto te atei sile riou alimiou u katunun tsitsilo i tar.”

*E Iesu e hatei mamin tega holis menaien e Pita
(Matu 26:31-35, Mak 14:27-31, Luk 22:31-34)*

³⁶ Be Saimon Pita e poeiena tere Iesu, “O Tsunono, ime te la uamou lö?” Be Iesu e ranga palise nen me poeiena, “Alö ema antunan kukute namoi lia tara pöata teka tara han te la uagou lia, kaba lö e kukute moto mou.” ³⁷ Be Pita e poeiena, “O Tsunono, e hana ba lia tema antunan kukute nagi lö tara pöata teka? Alia e antunan mate beie goulö.” ³⁸ Be Iesu e hohou rangata uana i tanen me poeiena, “Alö e antunan mate hamana bemou lia? U mana koru alia e ranga megou lö, tara bong teka, i mam te kekeretskö noua a keriou a tson, alö e holis namou tego atei sil menai lö alia a topisa a pöata!”

14

E Iesu nonei a maroro tere Tamanen

¹ “Alimiou goma tokumi. Hamana uaiam tere Sunahan na i tar. ² A makum e gono tara luma tere Tamar, na lia e la silegu tegona hamatskö mam menai a man makum i tamilimiou. Te goma mana uaien ba lia tema antunan hatei ragilimiou tegona kato taatago mei lia a man makum i tamilimiou. ³ Alia e la silegu tegona hamatskö mam menai a man makum i tamilimiou, ba lia tena la pouts guma romana batemi lu ragou limiou bara tena ka gono ria tara makum tena ka goua lia. ⁴ Na limiou e atei silemiou a maroro tara han te la uagou lia.”

⁵ Be Tomas e poeiena i tanen, “O Tsunono, alam ema atei silemi te la uamou lö. Ime temar atei sil mena moi lam a maroro?” ⁶ Be Iesu e poeiena i tanen, “Alia a maroro, na lia a nimana, na lia a nitöatöa. E möa ta taiana ta maroro tego la u tere Tamar. Alia puku a maroro tere Tamar. ⁷ Te atei

sile mia limiou alia, alimiu e atei sil hasemiu e Tamar. Te taniana i romana alimiu e atei sil tale men na limiou u tara hakape men.”

⁸ Be Pilip e poeiena i tanen, “O Tsunono, haröto ramei lam e Tamamölö, ba lam te sasaala mou.”

⁹ Be Iesu e poeiena i tanen, “Alia u solon ka gono meraiou limiou. Ba lö, o Pilip, tema atei sil noahase milia? A katuun te tare noulia e tara hasena e Tamar. Aha te pei sile milö, ‘Haröto ramei lam e Tamamölö?’ ¹⁰ Alimiu ema hamanami te ka uagu lia tere Tamar ne Tamar e ka has na i tar? U ranga te hatei ragi lia limiou ema la peisa nameia i tar. Kaba e Tamar te ka gono menoulia te katoena a man toukui peisa i tanen. ¹¹ Hamanaiam te ka uagu lia tere Tamar na te ka has uana e Tamar i tar. Kaba tema hamana mia limiou, hamana sila tala namia lia tara man hiharöto ti kati lia. ¹² U mana koru alia e hatei ragou limiou, a katuun te hamana uana i tar ena katoe nou a man toukui te katoe gulia. Na man toukui i tanen e la sei na nou a man toukui teka, taraha alia e la uagu tere Tamar. ¹³ Alia e katoe gou a ka te rangata sila namoa limiou tara solor, te kato uanen teka ba solona e Tamar te solosei sila naroua i tar. ¹⁴ Te rangata namoua limiou ta töa ta ka tara solor, alia te katoe gouen.”

E Iesu e hatein te la uanama romana u Namnamei u Göagono

¹⁵ Be Iesu e pei lelana, “Te ngile mia limiou alia, hengoeiam u raranga i tar. ¹⁶ Ba lia tena rangate gou e Tamar ba nonei te hala ranei limiou a tana Hihitaguhu, u Namnamei tara nimana tegomi ka gono nitöa meraiou limiou. ¹⁷ U katunura i puta

teka ema antunan lueri u Namnamei u Göagono teka, taraha nori ema tare rien na ema atei sil hase rien. Kaba limiou e atei sile men, taraha nonei e ka gono mera noulimiu na nonei e ka has noua i torimilimiu.

¹⁸ “Alia ema antunan laba ragoui limiou ba limiou te here moi u binai. E möa. Alia ena la pouts guma romana. ¹⁹ Ema lehana noi ba u katunura i puta tema tara lele roi lia, kaba limiou e tare moulia. Taraha, alia ena töatöa pouts gou romana ba limiou te töatöa has mou. ²⁰ A pöata e butu nama romana ba limiou tena atei sile mou alia e ka gia tere Tamar na limiou e ka has mia i tar na lia e ka has gia i tamilimiu. ²¹ A katuun te hengoena u raranga i tar bate kukutie nen, nonei a katuun teka te ngile noulia. Be Tamar te ngil hase nou a katuun te ngile noulia, na lia has e ngile gouen ba lia te hatare goien a peisar.”

²² Be Judas (ema Judas Iskariot nei) e poeiena tere Iesu, “O Tsunono, ime temar hatara pepeisa mena moilö a peisamölö i tamulam batema hatara rami a palair u katuun?” ²³ Be Iesu e ranga palisenen me poeiena, “Ere si te ngile riou lia te hengoe riou u raranga i tar, be Tamar te ngil has ranouen, na lam ena la has muma romana batemi kui luma mia i taren. ²⁴ Kaba u katuun tema ngileri lia ema hengo haseri u raranga i tar, na u raranga te hengoe milimiu ema la nameia i tar, kaba e la nama tere Tamar te tula namou lia.

²⁵ “Alia e hatei ragi limiou a manka teka te ka gono noa mera gilia limiou. ²⁶ E Tamar e hala sila nenama romana a katunun hihitaguhi, u Namnamei u Göagono, tara solor batemi hatuts ranei

limiou a manka hoboto, batemi hahatei pouts ranei limiou a mamananaka hoboto tu hatei rai lia limiou.

²⁷ “Alia e laba meragi limiou a masalohana, a masalohana i tar alia e hala ragien limiou. Alia ema mar hala uagi temar hala uar u katunura i puta. Kaba a masalohana i tar e niga bala nena a masalohana i taren. A torimilimiu egoma toku ii na egoma matout has ii. ²⁸ Alimiu e hengoe mula alia e pei gula i tamilimiu, ‘Alia e lagou, kaba lia e la pouts has guma romana i tamilimiu.’ Te ngile mia limiou alia, alimiu go sasaala meiam te la uagu lia tere Tamar, taraha e Tamar te pan bala nanou lia. ²⁹ Alia e hatei mam tala ragi limiou a ka teka, ba pöata te butu nouen ba limiou te hamane mouen. ³⁰ Alia ema antunan raranga pala lel gia i tamilimiu, taraha a kapan tara han i puta teka e la nama. A nitagala i tanen ema antuna neia i tar. ³¹ Kaba alia e katoegu a mamananaka te ranga memei lia e Tamar tego kati lia, ba u katuun hoboto te atei siler alia e ngil koruegu e Tamar.

“Takeiam, bara te lara.”

15

E Iesu nonei u ruein grep hamana u niga

¹ Be Iesu e ranga lenina me poeiena, “Alia u ruein grep hamana, ne Tamar a katuun terena kuin grep. ² Nonei e luba nena a man hikalanin grep i tar tema hua nei. A mamana hikalan te huana nonei e kato hagogoso sile neien tego hua hapara lel uen. ³ Alimiu i kato hagogoso hakapa raia ti hengo haniga mena milimiu u raranga ti hatei rai lia limiou. ⁴ Alimiu go ka gono memou

lia ba lia te ka gono has mera goulimiou. A hikalan ema antunan hua pepeisa nei. Nonei ega rokoto noa hasia i tuenreina u ruei bate tōan huana. Na e markato has uana iesana i tamilimiou. Alimiou ema antunan katoemi ta markato ta niga tegoma ka gono mena milimiou alia.

⁵ “Alia u ruei na limiou u hikalan. A hikalan e tōatōa sila na te ka uanen turu ruei, ba nonei te tōan hua haparana. Na e markato has uana iesana i tamilimiou. Te ka gono memia limiou alia balia teka gono has mera goulimiou, ba limiou te tōan kato hanigemiou a manka te ngilena e Sunahan. Kaba te laba namia limiou alia, ba limiou tema antunan kato nami ta tōa ta ka te ngilena e Sunahan.

⁶ A katuun tema ka gono menei lia e ba nariou. Nonei e here nei a hikalanin ruei te langona. A man hikalan teka e gono raier bate lapo raria turu tula bate haats raier. ⁷ Te ka gono memia limiou alia na te hengo hanige mia limiou u ranga i tar, rangata naiam ta ka te ngile milimiou ba limiou te lue moien. ⁸ Pōata te katoe mia limiou a markato a niga ba man markato teka te soloseiena e Tamar, ba limiou te harōto has namiou alimiou u katunun tsitsilo hamana i tar.

⁹ “Alia e ngil koru ragou limiou temar ngil koru has menanei lia e Tamar. Na limiou go ka gonon tōa has memou lia ba lia te ngil nitōa ragou limiou. ¹⁰ Te hengen tōa namoua limiou u raranga i tar ba lia te ngil koru noahas ragou limiou, tu mar hengo has mei lia u raranga tere Tamar, be Tamar te ngil koru hase noulia. ¹¹ Alia e hatei ragu lei limiou u ranga teka ba nisasaala i tar te kauana i tamilimiou ba nisasaala i tamilimiou te onoto hakapa nitōana. ¹² Alia e hatei ragou

limiou: hiangilngil uaiam temar ngil has mera gilia limiou. ¹³ E möa tu ngil tega antunaia turu ngil te mate sil menanei a töa katuun u katuun i tanen, nonei e haröto nena nonei e ngil koru ranen. E möa noahas tu ngil tega antunaia turu mar ngil teka. ¹⁴ Na te hengo hanige mia limiou u raranga i tar, alimiou u katuun i tar. ¹⁵ Alia ema ngö lel ragi limiou u katunun kui, taraha a katunun kui ema atei sile nei a ka te katoena a katuun te hakuie nen. Kaba alia e ngö tala ragi limiou u katuun hamatskö i tar, taraha alia u hatei hakapa railimiou a man raranga hoboto te hateia lia e Tamar. ¹⁶ Alimiou uma hopö kap nami lia kaba alia tu hopö kap raiou limiou. Na lia u tus raiou limiou tego tataala uaiam limiou bate katoe miou u ngil tere Sunahan. Be Tamar te hala ranoui limiou a manka te singo sile moua limiou tara solor i tanen. ¹⁷ Na lia e hatei ragi limiou u raranga teka ba limiou te hia ngilngil miou.”

U katunura i puta ema ngil rari limiou

¹⁸ E Iesu e ranga lel me poeiena, “Te raharaha raria limiou u katuun te ka mer u hakatsina i puta, atei sil haseiam nori i raharaha mameiou lia ba nori e töan raharaha rariou limiou. ¹⁹ Sanena tego katuun uami limiou i puta, u katuunur i puta sane ngil rariou limiou. Kaba e moa tala. Nori ema ngil rari limiou, taraha alimiou ema katuun lel uami i puta. Alia u luba hakapa raia limiou tara markatona i puta, nonei te raharaha be rari limiou u katunura i puta. ²⁰ Alimiou go hakats pouts naiam u raranga ti hala ra ii lia alimiou: a katunun kui ema pan nanei a tsunono i tanen. Nori u katuun ti kato homia i tar e kato homi has rariou

limiou romana, na u katuun te hengo hanigeier u raranga i tar e hengo haniga has rariou limiou. ²¹ Kaba nori e kato sila naroua a manka teka tara solor te söate milimiuu, taraha nori ema ateï sileri e Sunahan te tula na moulia. ²² Sanena lia tuma la mei batemi hatei ragien a man raranga i tar, ba nori te tatei peier, ‘Alam ema kato homi mi.’ Kaba tu la hamana ma lia batemi hatei ragien u raranga i tar, e möa tala tegi mar mous uaien. ²³ A katuun te omie noulia e omi hasena e Tamar. ²⁴ Sanena alia tuma katoei a man mirakol teka, tema katoei ta taina ta katuun i gusu ren, ba nori te tatei poeier, ‘Alam ema kato homi mi.’ Kaba nori i tara hakapa talei a man toukui i tar, ba nori e omie riou lia ne Tamar has. ²⁵ Nori e markato uar teka ba u raranga ti koloto naia turu Buku u Göagono te manana te poeiena, ‘Alia uma katoi taka ta omi, kaba nori i omi noa haseiou lia.’

²⁶ “Kaba lia ena hala na guma a katunun hi-hitaguhu i tamilimiuu, ba nonei temi hatei nanou lia, nonei u Namnamei na tara nimana te hala na nama e Tamar. ²⁷ Na limiou has te hatei namou lia, taraha alimiuu tu ka gono memou lia tu tanian kui mam ma lia te antunana i romana.”

16

¹ Be Iesu e ranga noana me poeiena, “Alia e hatei ragu lei limiou u raranga teka, taraha alimiuu e namots hapolase moulia te butuna romana a pöata a omi. ² Nori ena hapiou ba raroui limiou a man luman lotu, na nori e kato hamate has rariou a palai i tamilimiuu bate poeier, ‘Alam u kato mei a ka teka tegi solosei menai e Sunahan.’ ³ Nori e katoe riou a manka man omi teka, taraha nori

ema atei sile roi lia ne Tamar has. ⁴ Alia e hatei ragi limiou a manka teka ba tara pöata te butu nouen, ba limiou te hakats kap namou u raranga tu hala mam ra ii lia alimiou.”

A toukui turu Namnamei u Göägono

Be Iesu e pei lelana, “Alia uma hatei mam railimiou a manka teka, taraha alia u ngilin gamon ka gono meraiou limiou. ⁵ Kaba lia e la pouts uagou tere Tamar te hala namou lia, na limiou ema rangata hase milia, ‘Ime te la uamölö?’ ⁶ Kaba limiou e taatagi namou u raranga te hatei ragu lei lia limiou. ⁷ Kaba lia e hatei hamana ragou limiou, a tou la pouts i tar, a niniganiga i tamilimiou. Kaba tema la pouts goi lia, a katunun hihitaguhiu ema antunan la namei romana i tamilimiou. Kaba te la pouts goua lia, ba lia te hala nagu men romana i tamilimiou. ⁸ Na pöata te la namen romana, ba nonei temi haröto ranei u katuun te ka mer u hakatsina i puta a mouna a markato a omi, na mouna a markato a niga, na mouna u kout tere Sunahan. ⁹ Nori e hahamana nariou lia, na ka teka a mouna a markato a omi. ¹⁰ Na lia e la pouts uagou tere Tamar, ba limiou tema tara lele moi lia. A ka teka e haröto nena alia a mouna a markato a niga na u raranga i tar e manana. ¹¹ Na e Sunahan e ona ranou u katunura i puta, taraha nonei e hopö kap hakapein a nihahuna tara katuun te panna tara han i puta teka, nonei e Satan.

¹² “Alia e ka megu u raranga u parpara te ka noana, kaba alimiou ema antunan söata namien. ¹³ A pöata te la nama romana u Namnamei u Göägono na tara nimana, nonei emi haröto ranoui limiou a mamanaka te manana. Taraha, nonei

ema la mena mei romana u raranga i tanen. E möa. Nonei e hatei nanou a man raranga te hengoe nen tere Tamar. Na nonei u Namnamei u Göagono e hatei ranoui limiou a manka tena butu nou romana i murimuri. ¹⁴ Nonei e söata seie nou romana lia, taraha nonei e luenou a manka i tar bate haröto ranouien limiou. ¹⁵ A mamanaka hoboto tere Tamar, a mamanaka hoboto has i tar. Nonei te pei begu lei lia, ‘Nonei e lue nou a manka i tar bate haröto ranouien limiou.’ ”

A nitaatagi e butun nisasaala nou

¹⁶ Be Iesu e ranga lenina me poeiena, “A pöata e sukusuku hakapa ba limiou tema tara lele moi lia. Ba tema lehana lel noi ba limiou te tara poutse mou* lia.” ¹⁷ Ba palair u katunun tsitsilo i tanen e hiararangar me poeier, “Ime temar mouna uana u raranga teka? Nonei e pei lala, ‘A tsitabubun pöata ba limiou tema tare moi lia, ba tsitabubun pöata lel ba limiou te tara poutse moulia.’ Na nonei e pei hase lala, ‘Alia e la pouts uagou tere Tamar.’ ¹⁸ Ime te mouna uana u ranga te pei lalen, ‘A tsitabubun pöata’? Ara ema atei sile rei a ka te ranga nanen.”

¹⁹ E Iesu e atei sil nori i ngilin rangata naien, ba nonei e poeiena i taren, “Alimiou e hiarangrangata namiou ime temar mouna uana u ranga te hagou ranga nagula lia? ²⁰ U mana koru alia e ranga hamana mera goulimiou, alimiou e tabe mou bate har mou, kaba u katuun te ka mer u hakatsina i puta e sasaala riou. Alimiou e sagohe mou a kamits, kaba kamits i tamilimiou ena habirits ua nou tara nisasaala. ²¹ Pöata te

* **16:16:** E poeiena, E Iesu e mate nou bate töatöa poutsina.

katsin poseiena a tahol a pien, nonei e sagohena a kamits, taraha a tou posa i tanen e sulusukuna. Kaba pöata te butu hakapa lala a pien, nonei e solopalena a kamits, taraha nonei e sasaala koru mena te posa mela leien a pien. ²² Na e kato has uana iesana i tamilimiou. Alimiou e taatagi has mou, kaba alia e tara pouts ragou limiou. Ba limiou te töan sasaala koru mou, na e möa ta katuun tega antunan luban a nisasaala teka i tamilimiou. ²³ Nonei tara pöata, alimiou ema rangata lele moi lia ta ka. U mana koru alia e ranga hamana koru mera goulimiou, te singo sile mia limiou ta ka tere Tamar tara solor nonei e hala ranouen limiou. ²⁴ I manasa na te la noa hasina i romana alimiou uma singo silemi ta ka tere Tamar tara solor. Singoiam ba limiou te lue mouen, ba nisasaala i tamilimiou te onoto hakapa nitöa nou.”

E Iesu e la karasa hakapi a markatona i puta

²⁵ Be Iesu e ranga noana me poeiena, “Alia e rangan haharuei tuun gula i tamilimiou. Kaba i murimuri alia ema haharuei lel goi. E möa. Alia e ranga halesala tuun nagou e Tamar. ²⁶ Nonei tara pöata teka, alimiou e singo sila moa tara solor tere Sunahan. Alia ema pei gi alia e singo be ragou limiou tere Tamar. ²⁷ Taraha, e Tamar e ngil has ranou limiou, te ngil has menami limiou alia na limiou e hamana hase miou alia u lama tere Sunahan. ²⁸ Alia u la ma tere Tamar me la uaguma i puta teka. Na lia e laba negu a han i puta bate la pouts uagou tere Tamar.”

²⁹ Ba u katunun tsitsilo i tanen e poeier, “Alö e ranga halesala talam batema haharuei lelmi.

³⁰ Alam e atei talam alö e atei silem a mamananaka hoboto, ba tema ngile mi tegi rangata lel mei lö ta ka. Tara markato teka alam e hamanem alö u lama tere Sunahan.” ³¹ Be Iesu e hohou rangatana me poeiena i taren, “Alimiou e hamana talamiou? ³² A pöata e suku suku hakapa, na e butu hakapa noahas ba nori te kute rariou limiou ba limiou hoboto te bus kalakala pouts uamou turu luma i tamilimiou ba lia te ka pepeisa gou. Kaba lia ema ka pepeisa koru goi, taraha e Tamar e ka gono menou lia. ³³ Alia e mar ranga uagula teka ba masalohana i tar te tatei ka gono mera nou limiou. E manana, a markatona i puta teka e habute nou romana u nikamits i tamilimiou, kaba limiou go tagala iam, taraha alia u la karasa hakapi a markatona i puta.”

17

E Iesu e singo ber u katunun tsitsilo i tanen

¹ E Iesu e ranga hakapaia turu katunun tsitsilo i tanen me tara sei uana i Kolö me poeiena:

“O Tamar, a pöata e butu hamanasa talana. Solo sei a Pien i tamölö, ba Pien i tamölö te solo sei hase noulö. ² Alö u halei lia a nitsunono tego tara kap mei lia u katuun hoboto, ba lia te antunan hala ragi u katuun tu hala ramei lö alia a nitöatöa te ka nitöana. ³ Nonei teka a maroro tara nitöatöa te ka nitöana: u katuun te atei sile riou lö a Sunahan te mana nitöana, na lia e Iesu Kristo tu hala nema lö. ⁴ Alia u söata seia lö i puta, taraha alia u kato a mamananaka hoboto tu hatei lö alia. ⁵ Bara! O Tamar, hala tale mei lia a nikapan ti gum ma lia i rehimölö, a nikapan tu ka mam mei lia i mam te butuia a han i puta.

⁶ “Alia u hatein a solo mölö turu katunura i puta teka tu hala rai lö alia. Nori u katuun i tamölö, na lö u hala rameien lia, na nori i hengo hanigan nitöani u raranga i tamölö. ⁷ Nori e atei sil taler a mamanaka hoboto te ka megu lia e lama i tamölö. ⁸ Na lia u hala hakapa raien a man raranga tu hale mei lö alia, ba nori te hamane ren. Na nori e atei siler alia u la hamanama i tamölö, na nori e hamaner tu hala mena mei lö alia.

⁹ “Alia e singo bera gien i tamölö. Alia ema singo beragi u katuun hobotora i puta, kaba lia e singo beregu u katuun tu hala ramei lö alia, taraha nori u katuun i tamölö. ¹⁰ U katuun hoboto i tar u katuun has i tamölö, na u katuun hoboto i tamölö u katuun has i tar. Na nori te haröto ner a nikapan i tar. ¹¹ Alia ema ka lel goi tara han i puta teka, alia e la uagou i tamölö, kaba nori e ka roua tara han i puta teka. O Tamagulia alö te göagono korum, alö go tara kap raien tara nitagala i tamölö tu halei meilö alia, ba nori te katoe riou a töa katuun, te kato has uarara. ¹² Pöata tu ka gono meraien lia, alia u tara kap raien tara nitagala i tamölö. Alia u tara kapir u katuun tu hala ramei lö alia. A töa puku a katuun te taia, temar hatei mam menaien u Buku u Göagono.

¹³ “Na lia e la tala uagou i tamölö. Alia e katoegu u raranga teka i puta ba nori te sasaala nitöa has uar te sasaala uagu lia. ¹⁴ Na lia u hala raien u raranga i tamölö. Na u katunura tara markatona i puta e omi raren, taraha nori e hereri lia: alia ema katuun uagi tara markatona i puta, na nori ema katuun has uari tara

markatona i puta. ¹⁵ Alia ema rangata silegi alö go luba raien tara han i puta teka. E möa. Alia e rangata silegu tego hatongo kap meraien lö tara nitagala tere Satan. ¹⁶ Alia ema katuun uagi tara markatona i puta, na nori e hereri lia. Nori ema katuun has uari tara markatona i puta. ¹⁷ Na u raranga i tamölö e mana nitöana. Alö go ranga hahengo raien ba nori te hatalis ba ner a man markato a man omi. ¹⁸ Alö u hala mena mei lia turu katuun te ka mer u hakatsina i puta, na lia e hala has mera gien nonei noahas turu katuun teka. ¹⁹ Na lia e hala menagi a peisar i tamölö tego taguhu merai lia u katuun teka, ba nori te hala has menari a peisaren i tamölö.

²⁰ “Alia ema singo peisa beragi u katuun teka i tamölö, alia e singo be has regu u katuun te hengo riou romana u ranga i taren bate hamana uar i tar. ²¹ Ba nori te hereri a töa katuun. Na lö, O Tamar, e ka mia i tar na lia e ka gia i tamölö, Nori egi ka mei u töa u tori, te kato has uara ra, ba u katunura i puta te tatei atei sil haser tu hala mena mei lö alia. ²² Na lia e hala ragien a nikapan tu hala hase mei lö alia. Taraha, alia e ngilegu nori egi herei a toa katuun, te markato has uarara. ²³ Alia e ka gia i taren na lö e ka has mia i tar, ba nori te tatei tori hoboto has uar iesana. Te kato uanen teka ba u katunura i puta te tatei atei siler tu hala mena mei lö alia, na e tatei atei sil haser alö e ngil koru rem u katuun teka temar ngil has mena milö alia.

²⁴ “O Tamagulia, alö u hala rema u katuun teka i tar, na lia e ngilegu nori egina ka gono meiou lia tara makum tena ka goua lia. Ba nori

tena tare riou a nikapan i tar, a nikapan tu hale mei lö alia, taraha alö u ngil korueiou lia i mam te butuia a han i puta.

²⁵ “O Tamagulia, alö e matskö korum, u katunura tara markatona i puta ema atei sileri lö. Kaba alia e atei sile goulö. Na nori u katuun i tar teka e atei siler tu hala mena mei lö alia. ²⁶ Alia u haröto naia lö i taren, na lia e kato noahase gouen tara mamana pöata. Taraha, alia e ngilegu nori gi hiangilngil temar ngil has mena milö alia. Na lia e ka has goua i taren.”

18

Nori i pile kapiin e Iesu

(Matiu 26:47-56, Mak 14:43-50, Luk 22:47-53)

¹ E Iesu e singo hakapa uu tara Tsunono, ba nonei e la gono meraiena u katunun tsitsilo i tanen i hapalana a gohi i Kitron tara makum te kaia a kui, ba nori e tasu ria tara kui teka. ² E Judas, a katuun tega harötein e Iesu turu katuun ti paköeien, e atei sil hasi a makum teka, taraha e Iesu e roron hagum gono meraia u katunun tsitsilo i tanen tara makum teka. ³ Be Judas e lu rena u soldia na u katunun taratarakap tara Luman Lotu Pan ti la ma turu pris pan na u Parasi, ba nonei e peigi mera neien tara makum te kaia e Iesu. Nori i la mei a man lam na u bito na mankaan hiatatung.

⁴ E Iesu e atei sil a manka tega butuia i tanen. Ba pöata ti tukuia u katuun teka, be Iesu e la taatago rena men me poeiena i taren, “Alimiou e sakemiou esi?” ⁵ Ba nori e poeier, “E Iesu na i Nasaret.” Be Iesu e poeiena, “Alia e Iesu.” ⁶ Pöata

te peien, “Alia e Iesu,” be Judas na u katuun ti ka gono meien e hasula hatou murir me rusur i puta turu tsiktsiki. ⁷ Be Iesu e rangata lenina, “Alimiou e sakemiou esi?” Ba nori e poeier, “E Iesu na i Nasaret.” ⁸ Be Iesu e poeiena, “Alia e hatei hakapa ragulou limiou alia nonei e Iesu. Te sake milimiou alia, ba limiou te hala ba ramiou u katuun teka.” ⁹ Nonei e mar ranga uu teka tego kato hamana menaien u raranga te hagou ranga naien me poeiena, “O Tamagulia, alia uma hapolasei ta tōa turu katuun tu hale mei lö alia.” ¹⁰ Be Saimon Pita e lousena u lahoton hiatatung i tanen me ngats sukena a katunun kui tara tsunono pan turu pris me ngats sekilena a talinganen tara pal matou. A solona a katuun teka e Malkus. ¹¹ Be Iesu e poeiena tere Pita, “Alö go hasogo poutsi u lahoton hiatatung. Nonei a kamits teka te hopö kap bei lia e Tamar. Alia ema antunan ramagi.”

E Iesu i la mena mei tere Anas

¹²⁻¹³ Ba kapten turu ami na u soldia i tanen na u katunun taratarakap tara Luman Lotu Pan e pile kap ner e Iesu me kits naren, ba nori e piou mam narien tere Anas. E Anas nonei a halis a tson tere Kaiapas,* a tsunono pan turu pris turu hiningal teka. ¹⁴ Nonei e Kaiapas te ranga mei a pal kapan turu Jiu me poeiena, “E niga balana tega mate sil menai ta tōa puku ta katuun, u katuun hoboto.”

E Pita e holisin tego atei sil menaien e Iesu (Matiu 26:69-70, Mak 14:66-68, Luk 22:55-57)

* **18:12-13:** E Anas a tson pan a halis tere Kaiapas.

¹⁵ Be Saimon Pita na lia[†] e kukuteiem e Iesu. Ba lia e la gono meiegu e Iesu tara pal pori tara luma tara tsunono pan turu pris, taraha a tsunono teka e atei sileiou lia. ¹⁶ Kaba e Pita e tuol ia ielesala i hapalana a tamana tara ololo. Ba lia e la poutsugu mena ranga gono megu a tahol te pepeito kapiin a tamana tara ololo ba nonei e hatasuena e Pita. ¹⁷ Ba nonei a tahol teka e poeiena tere Pita, “Alö has a töa katunun tsitsilo tere Iesu?” Be Pita e poeiena, “E möa.” ¹⁸ U katunun kui na u katunun pepeito kap i haatsi u tula, taraha a ka e hamuri. Ba nori e tuol hahiser u tula be meimeir. E Pita e tuol gono has meraien bate meimeina.

*A tsunono pan turu pris e rangrangati e Iesu
(Matiu 26:59-66, Mak 14:55-64, Luk 22:66-71)*

¹⁹ Ba tsunono pan turu pris e rangate nei e Iesu u katunun tsitsilo i tanen na mar hihatuts i tanen. ²⁰ Be Iesu e poeiena i tanen, “Alia u roron rangaia i matar u katuun. Na lia u roron hihatutsia tara man luman lotu a man tetenei na tara a Luman Lotu Pan, a man makum ti roron gono hobotoia u Jiu. Alia uma ranga hamousi. ²¹ Aha te rangrangata sile milö alia? Alö go rangater u katuun ti hengoe iou lia. Nori e atei siler a man raranga tu hatei raien lia.” ²² Pöata te ranga naia e Iesu a ka teka, ba töa katunun pepeito kap te tuol ia i rehinen e tapale nen me poeiena, “Alö goma mar ranga uai teka tara tsunono pan turu pris!” ²³ Be Iesu e poeiena i tanen, “Te ranga homi gula lia, balö te hatei nem u ranga u omi te ranga nagula lia. Kaba te ranga haniga gula lia, aha te tapala sile muleilö alia?” ²⁴ E Iesu e ka noa mei a kits, be

[†] **18:15:** E Jon e ranga sil poutsena, a peisanen.

Anas e hala mena neien tere Kaiapas, a tsunono pan turu pris.

E Pita e holis lenin e Iesu

(Matiu 26:71-75, Mak 14:69-72, Luk 22:58-62)

²⁵ E Pita e meimei noaia turu tula, ba u katuun e poeier i tanen, “Alö has a töa katunun tsitsilo tere Iesu?” Be Pita e holisina me poeiena, “E möa!” ²⁶ Ba töa katunun kui tara tsunono pan turu pris, a sungutuna a katuun a talinganen te ngats sekilema e Pita, e poeiena tere Pita, “Alia e peiegu alia e tara ragu moulimiou mere Iesu tara kuin olip.” ²⁷ Be Pita e holis lenina me poeiena, “E möa!” Ba keriou a tson e kekeretskö hamanasana.

E Iesu e tuol ia i matana e Pailat

(Matiu 27:1-2,11-14, Mak 15:1-5, Luk 23:1-5)

²⁸ Tara lunlan koru ba nori e laba ner a luma tere Kaiapas mena piou naria e Iesu tara luma tere Pailat a gamman. Ba u Jiu ema la sokö uari iahana luma, taraha a lo i taren e poeiena, a katuun te tasuna iahana luma tara katuun halhal turu Jiu ema antunan noue nei a kannouna turu Paska turu Jiu. ²⁹ Be Pailat e lakasa uana i taren me poeiena, “Alimiou e kout memi a katuun teka aha?” ³⁰ Ba nori e poeier i tanen, “Sanena a katuun teka tema kato homii, alam ema antunan mi piou nami ien i tamölö.” ³¹ Be Pailat e poeiena i taren, “Alimiou go lue men batena kout namien tara lo peisa i tamilimiou.” Ba u Jiu e poeier, “Alam ema antunan kato hamate nami ta katuun.” ³² A ka teka e kato hamani u raranga tere Iesu te ranga mam naien nori ena hakutie rien romana tara kuruse, taraha u katunura i Rom pepeisa te antunan markato uar teka.

³³ Be Pailat e tasu poutsuna iahana a luma me ngöena e Iesu me poeiena i tanen, “Alö a King turu Jiu?” ³⁴ Be Iesu e mar ranga palis mena neien teka me poeiena, “Alö peisa te hakats nem a ka teka, tsi alö u hengo naien tara tana katuun?” ³⁵ Be Pailat e poeiena, “Alia ema Jiugi! A hun katuun noa has i tamölö na u pris pan i taren te piou naria lö i tar. Aha tu kati lö?” ³⁶ Be Iesu e poeiena, “Alia a töa king, kaba alia ema king uagi i puta teka. Sanena alia a kingina i puta teka, ba u katuun i tar temi hiatatung sile riou lia ba pal kapan turu Jiu tema antunan pile kap naroi lia. Kaba lia ema king uagina i puta teka.” ³⁷ Be Pailat e poeiena i tanen, “Kaba lö a king noahas, boka?” Be Iesu e poeiena, “Aa, nonei a ka ti posa silei lia. Alia u tuhana sileia i puta tego hatei merai u katuun a Nimana. U katuun hoboto te ngiler u Mana e hengo hanige rioulia.” ³⁸ Be Pailat e poeiena i tanen, “Aha nonei, u Mana?”

Nori i rangein tega mate uu e Iesu

(Matu 27:15-31, Mak 15:6-20, Luk 23:13-25)

E Pailat e ranga hakapa me lakasa pouts uana turu Jiu me poeiena i taren, “Alia ema sabiegi ta ka ta omi tara katuun teka. ³⁹ Kaba limiou e ka memiou a markato te hapuresse menari a töa karabus tara mar pöata turu Paska teka. Alimiou e ngile miou alia go hapuresse berai limiou a King turu Jiu?” ⁴⁰ Ba nori e ku hapanir me poeier, “E möa, hapuresse e Barabas!” E Barabas a katuun a kopkop ne roron atung hasir u katuun.

19

¹ Be Pailat e luena e Iesu me halahus nanen. ² Ba

u soldia e hil haperperere ier a kolits a hihitoka, ba nori e hake rien i bakunen me hasoge rien u hasobö a hihol i tanen te la sei koru. ³ Ba nori e la uarima i tanen me poeier, “Soloseiam a King turu Jiu,” ba nori e tapala narien i matanen. ⁴ Be Pailat e lakasana ielesala me poeiena i taren, “Taraiam! Alia e lu halakasa mena gien i tamilimiou ba limiou te atei silemiou alia ema sabiegi ta ka ta omi i tanen.” ⁵ Be Iesu e lakasa uana ielesala, nonei e hasogi u hata u hihitoka na u hasobö a hihol i tanen te la sei koruna. Be Pailat e poeiena i taren, “Taraiam! Nonei a katuun teka!” ⁶ Pöata ti tareia u pris pan na u polis e Iesu ba nori e ku hapanir me poeier, “Nila namia tara kuruse! Nila namia tara kuruse!” Be Pailat e poeiena i taren, “Alimiou peisa tegomi lue men ba limiou tena nila namien tara kuruse. Alia ema sabiegi taka ta omi i tanen.” ⁷ Ba u Jiu e ranga palis uar i tanen, “Alam e ka mem a lo te poeiena nonei ega mate noua lasi, taraha nonei e pei nonei a Pien Tson tere Sunahan.”

⁸ Pöata te hengoeia e Pailat a ka teka, ba nonei e matout koruna. ⁹ Ba nonei e tasu pouts uana i luma tara gamman me poeiena tere Iesu, “Ime tu la malö?” Kaba e Iesu ema palise ii u ranga i tanen. ¹⁰ Be Pailat e poeiena i tanen, “Aha tema ranga memi lö i tar? Alö e atei hasem alia e ka megu a nikapan tego hapurese menai lia alö na nikapan has tego hanila menai lia alö tara kuruse.” ¹¹ Be Iesu e ranga palis uana i tanen me poeiena, “Sanena e Sunahan tema halei lö ta nikapan, alö sane möa hasem ta nitagala tego pitaputa menai lö alia. Kaba a katuun te hala nelala lia i limamölö, a markato a omi i tanen e pan bala nena a markato

a omi i tamölö.” ¹² Pöata te hengoeia e Pailat a ka teka ba nonei e ngil korueiena tega hapurese menaien e Iesu bate lana. Ba u Jiu e kur me poeier, “Te hapurese moua lö a katuun teka bate lana, alö ema hahikapien lel uamoi tara gamman pan e Sisa! A katuun te poeiena nonei a king e paköena e Sisa.” ¹³ Pöata te hengoeia e Pailat u ranga teka banonei e lu halakasa mena nei e Iesu ielesala me gumna turu gungum tara tson onuna turu raranga tara makum ti ngöei turu HaHibru i Gabata. ¹⁴ Nonei u lan tegi hamatsköeien a manka turu Paska turu Jiu na ka e söasa hakapa. Be Pailat e poeiena turu Jiu, “Nonei a king i tamilimiou teka!” ¹⁵ Ba nori e ku lelier me poeier, “Atung hamateiam! Atung hamateiam! Nila namia tara kuruse!” Be Pailat e rangata ranen, “Alimiou e ngilemiou alia ego hanila naia a king i tamilimiou tara kuruse?” Ba u pris pan e ranga palise ren me poeier, “Alam u möa ta tana ta king. E Sisa lasi a töa!” ¹⁶ Be Pailat e hapile raneien e Iesu tegina nila menaien tara kuruse.

E Iesu i nila naia tara kuruse

(Matiu 27:32-44, Mak 15:21-32, Luk 23:26-43)

¹⁷ Ba nori e lueier e Iesu, ba nonei e söata peiseiena a kuruse i tanen me lakasa uana tara makum ti ngöei U Lakö turu Baku. Turu rangana i Hibru i ngöeien i Golgota. ¹⁸ A makum teka nonei ti nila naien tara kuruse, ba nori e nila has raier a huol a katuun tara tana huol a kuruse, a tabi i hapala na tabi i hapala, be Iesu te kana i hagus.

¹⁹ Be Pailat e hakoloto nena a töa makumun raranga me hake rien tara kuruse. Na makumun ranga teka e pei: IESU NA I NASARET, A KING TURU

JIU. ²⁰ U Jiu u para ti riti u ranga teka, taraha a makum ti nila naia e Iesu tara kuruse ema lehana banai a taun. A makumun ranga teka i koloto naia turu topisa u mar ranga: U HaHibru nu HaLatin nu HaGrik. ²¹ Ba u pris pan turu Jiu e poeier tere Pailat, “Alö goma koloto nai: ‘A King turu Jiu.’ E möa. Alö go kolotein: ‘A katuun teka e pei, Alia a King turu Jiu.’ ” ²² Be Pailat e ranga palis ranen me poeiena, “U ranga te hakoloto nagula lia, alia e koloto hakapa nagulen.”

²³ I murina ti nila hakapa naia u soldia e Iesu tara kuruse, ba nori e luer a man hasobö i tanen me molamolerien tara tohats a soldia, a töa soldia nen nena makum. Nori i lu hasi u hasobö u ngahangaha i tanen te möa ta samap i tanen. Nonei a töa makumun hasobö a ohots. ²⁴ Ba u soldia e hiararanger me poeier, “Aragi ma kiis kakateien. Aragi pilei satu sil tuneien bara te tare rou esi te lue noien.”

A ka teka e butu sil tega mana uu raranga turu Buku u Göagono te poeiena:

“Nori i molamoleia a peisaren a man hasobö i tar.

Ba nori e pilei satu siler esi tega lu u hasobö u ngahangaha i tar.”

U soldia i markato has menaien teka.

²⁵ Tara pöata teka e tsinana e Iesu, mere toulana e tsinanen ne Maria a tahol tere Klopas, ne Maria Matalina, nori a touhaliou teka i ka hoboto. ²⁶ Be Iesu e tarena e tsinanen na lia a katunun tsitsilo te ngil korueien, alam u tuol hobotoia i rehinen. Be Iesu e poeiena tere tsinanen, “A katunun tsitsilo teka, a pien i tamölö.” ²⁷ Ba nonei e poeiena i tar, “E tsinamölö teka.” Na nonei tara pöata teka ba lia

e lu menagi e tsinana e Iesu tara luma i tar tegona ka nitöaien.

E Iesu e mate

(Matiu 27:45-56, Mak 15:33-41, Luk 23:44-49)

²⁸ I murina a ka teka, ba pöata te atei sileia e Iesu a mamana toukui i tanen e kapa, ba nonei e poeiena, “Alia e makagu.” U ranga turu Buku u Göagono e butu hamana tala te ranga menaien u ranga teka. ²⁹ A kaan osul te saputi u uain u melil e ka, ba nori e hapöluseier a ka te tatei sopena u uain turu uain u melil me hake rien tara tsi kalan ruei ti ngöei u hisop, ba nori e hasoa menarien i runguna e Iesu. ³⁰ Be Iesu e ousena u uain me poeiena, “A toukui hoboto i tar e kapa talana.” Ba nonei e tötörökö putana me matena.

U soldia i saki a liklikina e Iesu

³¹ A pöatan hamatskö turu Paska turu Jiu, na nori ima ngilei a man tuenrei egi kute noaia tara kuruse tara mar pöata teka. Taraha u lan u Göagono turu Jiu i mahö na u lan teka e Göagono koruna. Ba nori ena rangater e Pailat tego haniga menaien tegi peko menai a man mour u katuun ti kuteia tara man kuruse na tegi hakoul mei a man tuenrei i taren tara kuruse. ³² Ba u soldia e lar mena pekoer a man mouna töa katuun te kute gono mei e Iesu. Na nori i peko hasi a man mouna tabi te kaia i hapala. ³³ Ba nori e la uarima tere Iesu me tareier e Iesu e mate hakapa, ba nori ema pekoeri a man mounen. ³⁴ Kaba a töa a soldia e sake ii a liklikina e Iesu u saka. Ba u rahatsing na u ramun e lakasa soköna. ³⁵ Alia e Jon tu tarei a ka teka alia u hatei hakapein u ranga. U raranga i tar e manana, na lia e atei sil hasegu te mana uana u

ranga i tar. ³⁶ A ka teka e butu bate kato hamanena u raranga turu Buku u Göagono te poeiena, “E möa tu töa tu tsinö i tanen tegi tatei peko romani.” ³⁷ Na u tana u raranga turu Buku u Göagono e markato uana teka, “Nori ena tare riou a katuun ti sakeien u saka.”

E Iesu i hongeia tara kiou

(Matiu 27:57-61, Mak 15:42-47, Luk 23:50-56)

³⁸ Pöata te kapaia a manka teka, be Josep a katuununa tara taun i Arimatia ena rangatena e Pailat tego lu menaien u tuenrei tere Iesu. E Josep a töa katunun tsitsilo tere Iesu, kaba nonei e matoutir u Jiu me hamousena a nihamana i tanen. Be Pailat e hanigana, be Josep e lana mena lu hakouleiena u tuenrei tere Iesu. ³⁹ E Nikodemus, a katuun te la mam uala tere Iesu tara bong, e la gono has mema e Josep na e söata hasema a man potsingina u huol u mar ruei ti ngöi u mer na u alos. Nori i sohala hoboto raien na nitiamana i taren e antuna tara 45 kilo. ⁴⁰ Be Josep mere Nikodemus e lueier u tuenrei tere Iesu me pitse ri ien u labalaba u lamelame te ka mei u potsing te soka haniga koru, temar kato uar u Jiu te kaho mena rien a katuun. ⁴¹ E kamei a kui e kaia i rehina makum ti kato hamateia e Iesu, na kui teka e kamei a kioun mate a tsimus. E möa noa ta töa tegi hongeia tara kiou teka. ⁴² U Lan u Göagono turu Jiu e sukuuku tala, ba nori e hongeria e Iesu iahana kiou teka, taraha nonei a kiou te kaia i sukuuku.

20

E Iesu e takei poutsia tara tou mate

(Matiu 28:1-8, Mak 16:1-8, Luk 24:1-12)

¹ Tara bongbong koru turu lan tutuun turu wik te kuhil noaia a ka, be Maria Matalina e la uana tara kioun mate. Ba nonei e tarena a hatu ti hapili kap nai a kiou i lubana ii a matana a kiou. ² Ba nonei e piata uana tere Saimon Pita na i tar mena poeiena i tamulam, “Nori e lue lila e Iesu tara kiou, alam ema atei silemi ime tena hake lilen!” ³ Ba lam mere Pita e laba namuma a han me la uaiem tara kiou. ⁴ Alam a huol u piata hoboto, kaba lia u piata bani e Pita mena tuku mam gia tara kiou. ⁵ Ba lia e turu putagu me taregu u labalaba u lamelame e ka, kaba lia uma tasu uai iogana. ⁶⁻⁷ Be Saimon Pita e piata hamurimurima me la sokö nitöa uana tara kiou, mena tareiena u labalaba ti pitsei u tuenrei i tanen e opö na u labalaba ti pits hahise ii a bakuna e Iesu. Kaba u labalaba teka ema opö gono mei u labalaba ti pitse ii u tuenrei i tanen. Nonei e tapits peisa me opö pepeisana tara tana makum. ⁸ Ba lia tu tuku mam tara kiou e töan tasu hasigu me taregu a ka teka me hamanagu. ⁹ Kaba alam uma atei haniga sil koru noei u raranga turu Buku u Göagono te poeiena nonei ega takei poutsia tara tou mate i tanen. ¹⁰ Ba lam e la poutsum tara makum tu kaia lam.

*E Iesu e butuia tere Maria Matalina
(Matiu 28:9-10, Mak 16:9-11)*

¹¹ Kaba *e Maria e tuol ia tara matana kiou bate tabena. Pöata te tabeien ba nonei e turu putana me tara uana iahana kiou. ¹² Ba nonei e tarena a huol a angelo i ka mei u hasobö u hiaka nitöa, nori i gum ia tara makum te opöia u tuenrei tere

* **20:11:** A pöata te hatei hakapa raian e Iesu ema kai ba nonei toum e kute tasu pouts ra nen.

Iesu, a töa e gum ia tara pala te baku uaien na tabi e gum ia tara pala te mou uaien. ¹³ Ba nori e rangate ren, “A tsi tahol, aha te tabe sile mölö?” Be Maria e ranga palis ranen me poeiena, “Nori e söate lila a Tsunono i tar, na lia ema ateigi ime tena na hake lilen!” ¹⁴ E Maria e mar ranga uu teka ba nonei e habiritsina me tarena e Iesu te tuol uaien, kaba nonei ema atei silei nonei e Iesu. ¹⁵ Be Iesu e rangate nen, “A tsi tahol, aha te tabe sile mölö? Esi te sakie mölö?” E Maria e pei talasi nonei a tson te taratara kapiin a kui, ba nonei e poeiena i tanen, “A tsi tsunono, tu söata halhale len lö, hatei mou lia ime tuna hakeien lö ba lia tena lue gouen.” ¹⁶ Be Iesu e poeiena i tanen, “Maria!” Ba e Maria e habirits uana i tanen me poeiena turu HaHibru, “Rabonai!” U mar ranga teka e poeiena, “Tson Hihatuts.” ¹⁷ Be Iesu e poeiena i tanen, “Möa tu pile kap naiou lia, taraha alia ema la noa gi iasa tere Tamar. Kaba alö go la tara man hahatoulana i tar, u katuun te hamana ria i tar, balö tena hatei ramen alia e la uagu iasa tere Tamar na e Tamamilimiou has. Alia e la uagu tere Sunahan i tar na tere Sunahan has i tamilimiou.” ¹⁸ Be Maria Matalina e lana mena ranga meraiena u katunun tsitsilo me poeiena, “Alia e tara hakape guma a Tsunono!” Ba nonei e hatei has raneien u ranga te ranga memeien e Iesu.

*E Iesu e butuia turu katunun tsitsilo i tanen
(Matiu 28:16-20, Mak 16:14-18, Luk 24:36-49)*

¹⁹ Nonei noahas turu lan, alam u katunun tsitsilo u matoutir u Jiu, me hapili raiem u tamana tara luma tu kaia lam. A pitala e tsiruku hakapa nonei turu lan tutuun turu wik teka, be Iesu e

butuna me tuolna i gusu mulam me poeiena i tamulam, “A masalohana e tatei ka gono mera noulimiou.” ²⁰ Nonei e ranga hakapa ba nonei e harōto ranei lam a man limanen na liklikinen. Ba lam u katunun tsitsilo e sasaala koru mem tu tara menai lam a Tsunono. ²¹ Be Iesu e ranga lelma i tamulam me poeiena, “A masalohana e tatei ka gono mera noulimiou. E Tamar e tula mena mei lia i puta na lia te tula has ragou limiou.” ²² Nonei e mar ranga hakapa uu teka ba nonei e pihu uana i tamulam me poeiena, “Lueiam u Namnamei u Göagono. ²³ Te luba memoi limiou a man markato a man omi turu katuun, ba markato a omi teka te taiana. Tema luba ramoien limiou ba man markato a man omi teka tema antunan taia has noi.”

E Iesu mere Tomas

²⁴ E Tomas, nonei a tōa i tamulam a maloto na huol ti ngō hasei “e Didimus,” ema ka gono merai lam tara pōata te lama e Iesu. ²⁵ Ba palair u katunun tsitsilo e hateie ren me poeier, “Alam e tara hakape mula a Tsunono.” Be Tomas e poeiena i taren, “Tema tare goi lia u gahilina tara nila i limanen, na tema tupa nagoi lia a kabeler tara man makum turu nila, na tema tupa nagoi lia a limar i liklikinen, alia ema antunan hamana gi.” ²⁶ U tōa u wik e la hakapa, ba lam u katunun tsitsilo i tanen e ka pon mia i luma, na tara pōata teka e Tomas e ka gono meraiou lam. A man tamana i pili,† kaba e Iesu e tasuma memi tuol pon na i gusu mulam me poeiena, “A masalohana e tatei ka gono mera noulimiou.” ²⁷ Ba nonei e poeiena tere

† **20:26:** A man tamana i pili hakarapotir me lok raier.

Tomas, “Hakeia a kabelemölö teka, balö te taram tara man limar, hasoa nema a limamölö bate tupa namen iogana i liklikir. Möa tu hahamana, alö go hamana.” ²⁸ Be Tomas e ranga palis uana i tanen me poeiena, “O Tsunono na e Sunahan i tar!” ²⁹ Be Iesu e poeiena i tanen, “Alö e hamana mem te tara mena milö alia. A nikalala pan turu katunun tima tarei lia kaba nori e hamana noa hasir.”

A ka ti koloto sile ii u buku teka

³⁰ E Iesu e kato hasi a man taina a man mirakol a man parpara koru i matar u katunun tsitsilo i tanen kaba lia ima koloto hakapa naien iahana u buku teka. ³¹ A man raranga teka i koloto sile ii tego hamana mena milimiou e Iesu nonei e Mesaia, a Pien Tson tere Sunahan. Na te hamana mia limiou i tanen ba limiou te lu sila has namoua a nitöatöa tara solo nen.

21

E Iesu e butuia tara tohit a katunun tsitsilo

¹ I murina a manka teka e Iesu e butu lelia turu katunun tsitsilo i tanen tara Ramun i Galili te ngö haseri a Ramun i Taibirias. Nonei e mar butu u teka. ² Alam mere Saimon Pita, ne Tomas ti ngö hasei “e Didimus,” ne Natanielina i Kena i Galili, na lam a galapien tson tere Sebedi, na huol lel has a aposol i ka gonogono hoboto. ³ Be Saimon Pita e poeiena i tamulam, “Alia ena hagalagu.” Ba lam e poeiem i tanen, “Alam e la gono has memou lö.” Ba lam e sua talam mena hagala halanim, kaba lam uma soohe mei ta töa ta iena. ⁴ A pitala e katsin butuma, be Iesu emi tuolna i kotolana. Kaba alam uma mareien. ⁵ Ba nonei e poeiena i tamulam, “A galapien, alimiou e soho hase muma ta iena?” Ba

lam e poeiem, “E möa.” ⁶ Ba nonei e poeiena, “Lapo menami a abe tara pal matou, ba limiou te soohe mou ta iena.” Ba lam e lapo nem a abe mema antunan las hasei nami a abe tara tolaala, taraha a abe e saputu homi nitöani u iena me katsin takala tununa.

⁷ Ba lia e poeiegu tere Saimon Pita, “Nonei a Tsunono!” Ba pöata te hengoeia e Pita u ranga teka, ba nonei e hasei boroborena u hasobö i tanen me kurapa uana turu ramun me ape sunguna. ⁸ Kaba a palai i la gono mema a tolaala bate las tala naruma a abe a saputu tara iena, taraha nori ima lehana bana ii a kotolana, u tolima u maloto a ngaha puku. ⁹ Pöata tu sung hakapa ma lam, ba lam e tarem u tula te kamei a matsi iena ti hōia i tanen, na beret has e ka. ¹⁰ Be Iesu e poeiena i tamulam, “La memuma ta iena te soohe muma limiou.” ¹¹ Be Pita e sei pouts uana tara tolaala me las hasungena a abe iena a saputu. A para koru a iena a kapan, e antunaia tara 153, kaba a abe ema takala ii. ¹² Be Iesu e poeiena i tamulam, “La muma mi nouiam.” Kaba alam uma rangatanai nonei esi, taraha alam u atei sil nonei a Tsunono. ¹³ Be Iesu e hanou ranei lam a beret na iena. ¹⁴ Nonei a hatopisana a pöata teka te butuia e Iesu turu katunun tsitsilo i tanen i murina te takei pouts ien tara tou mate.

E Iesu mere Pita

¹⁵ Pöata tu nou hakapaia lam, be Iesu e poeiena tere Saimon Pita, “O Saimon, a pien tere Jon, alö e ngil hase moulia? U ngil i tamölö e pan saluhe ba nena u ngil turu katuun teka?” Be Pita e poeiena i tanen, “Aa, o Tsunono. Alö e atei silem alia e ngil

korue goulö.” Be Iesu e poeiena i tanen, “Ha nou ri u tunan sipsip i tar.” ¹⁶ Be Iesu e rangata hahuol lelana e Pita me poeiena, “O Saimon, a pien tere Jon, alö e ngil hase moulia?” Be Pita e poeiena i tanen, “O Tsunono, Alö e atei silem alia e ngil korue goulö.” Ba e Iesu e poeiena, “Tara kapir u sipsip i tar.” ¹⁷ Ba e Iesu e rangata hatopiseiena e Pita me poeiena, “O Saimon, a pien tere Jon, alö e ngil hase moulia?” Ba torina e Pita e tiama koru tala mei te rangata hatopisa uu e Iesu me poeiena, “Alö e ngile moulia?” Ba nonei e poeiena tere Iesu, “O Tsunono, alö e atei silem a mamanaka hoboto, na lö e atei sil hasem alia e ngil korue goulö.” Be Iesu e poeiena i tanen, “Hanouri u sipsip i tar. ¹⁸ U mana koru alia e ranga hamana megou lö, a pöata tu hitots noaia lö, alö u hula la mei u ngil peisa i tamölö. Kaba pöata te tsonpan mia romana lö, balö te hasoa nemou a limamölö ba palair u katuun te kitse riou lö bate na piou naria lö tara makum tema ngilin la uamilö.*” ¹⁹ E Iesu e mar ranga uu teka bate haröto nena temar solosei mena nei romana e Pita e Sunahan tara pöata te atung hamate rien romana. Be Iesu e poeiena i tanen, “Kukute mou lia.”

E Iesu mere Jon

²⁰ Be Pita e habirits uana i muriren me tare noulia, tu kukute mera meien lia, alia tu ngil korui e Iesu. (Alia a katuun tu habuaia tere Iesu tara kannou me poeiegu, “O Tsunono, esi nonei te haröto nanou lö turu katuun te paköe riou lö?”) ²¹ Ba pöata te tareia e Pita alia, ba nonei e poeiena

* **21:18:** Nonei teka u hahatei mamamuna tegina hakute menai e Pita tara kuruse.

tere Iesu, “O Tsunono, aha te butuna romana tara katuun teka?” ²² Be Iesu e poeiena i tanen, “Te ngile gia lia nonei ega tötöa nitöa e antunana tara pöata te kopis pouts guma romana lia, a ka teka ema ka uanei i tamölö. Kukute mou lia!” ²³ Ba u raranga e tala uana turu katuun hoboto tere Iesu te pei menaien alia ema antunan mate gi romana. Kaba e Iesu ema pe ii alia e Jon ema mate gi romana. E möa. Nonei e pei lasi, “Te ngile goua lia nonei ega tötöa nitöa e antunana tara pöata tena kopis pouts guma romana lia, a ka teka ema ka uanei i tamölö.” ²⁴ Alia e Jon, a katunun tsitsilo tere Iesu te koloto negu a manka teka. Alia u tara peisein a matar balia te hatei nagen, na lam e atei silem te mana uana u raranga teka. ²⁵ Kaba e Iesu e kato hasi a man palaina a manka a man parpara. Na sanena a manka teka gi koloto hakapa hoboter, ba han i puta teka te moa nou ta makum tegi haka raia a man buku teka.

U BULUNGANA U NIGA
The New Testament in the Halia Language of Papua
New Guinea
Nupela Testamen long tokples Halia long Niugini

copyright © 2020 Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

PDF generated using Haiola and XeLaTeX on 8 Mar 2023 from source files dated 5 May 2022

03815460-d6a0-5a59-aa7b-2a4278f7e67d